

TÈYÂTE WALON

BARDAF !

Ou

On dîmègne a roûvî

Comèdèye-våd'vèye

di 3 akes

da Léon Fréson

Bardaf !

Les djins :

Nadine	Ine djône feume (a hipe 40 ans) mariyêye a in-ome d'afêre
Alice	Li chervante dè manèdje (ine djône feume)
Bènwèt	On vwèzin (l'adje qu'on vout mins 40 ans po l'mons)
Denise	Li feume da Bènwèt
Sonia	Li fèye dèl mohone (16 ans)
Julie	Ine « pôve » bâcèle ècinte di 8 meûs (vès les 20 ans)
Marco	In-ovrî « dépaneûr » (a pô près li minme adje qu'Alice)
Pauline	Li feume dè galand da Nadine (èvès les 40 ans)
Estelle	Ine feume qui vint d'on n'sét wice (l'adje qu'on vout)
Victôr	L'ome da Estelle

Li dècôr : on sâlon è bungalow da Nadine èt si-ome. E fond, on hall d'intrêye qui done so l'ouh' d'âd'foû, so l'plèce wice qu'on est èt so l'sâle a magnî èt l'couhène. Dè costé di l'ouhe d'intrêye, ine pwète-fignèsse (avou on volèt) qui done so on parc ou so l'vôye. Di l'ôte costé, deûs pwètes po les tchambes èt eune po l'sâle di bagne.

Prumîr ake

On dimègne d'awousse à matin. Nadine, nin co moussêye est drèssêye divant li f'gnèsse à lådje. Ele fêt des sènes « à r'veûye » èvès l'à d'foû.

1. Nadine : Awè... Et surtout, rim'nez avou on bon contrat ! (*On ètind ine auto qui s'mète en marche pwis qu'ennè va. Nadine sère li f'gnèsse pwis tote djoyeûse, va prinde si GSM so 'ne tâve ou so on meûbe*) Asteûre qui l'vôye est libe, vite on p'tit messèdje po Simon... (*Ele dit çou qu'èle sicrèye*) Mi p'tit tchou, Dji sos bin tote seûle come prévèyou... Vinez ossi vite qui vos polez... Dji v'rabrèsse... tot ratindant mî...
Et vola ! Dji n'a pus qu'a m'fé gâye ! (*èle sôrteye vès s'tchambe èt lê l'ouhe à lådje.*)

On veût adon Alice qui s'amon.ne èt qui louke a li f'gnèsse. Come èle ni veût persone, èle va-st-intrer avou s'clé po l'pwète principåle.

2. Alice : (*distant è hall*) Ni v'dèrindjîz nin, c'est mi Alice !
3. Nadine : Alice ! Qui v's-arive-t-i ?
4. Alice : A mi ? Rin madame
5. Nadine : Mins quéle aweûr di v'veûye chal po on dimègne ?
6. Alice : Mådjinez-v's èdon madame qui dji d'veve aller veûye mi mame qu'est malåde mins dj'a raté mi-autobus... Çà fêt qui dji v'vinéve dimander si dji pous fé m'djoûrnêye oûy èl plèce di d'main po poleûr aller d'lé m'mame demain èl plèce d'oûy, comprindez-v's ?
7. Nadine : Fwêrt bin mins pokwè n'prindez-v's nin l'cis qui sût ?
8. Alice : Mârdi ? Dji vins chal ossi èdon...
9. Nadine : Dji djâsève di l'autobus savez mi
10. Alice : Dji n'sâreûs èdon madame, i n'a pu nouk'. Les autobus sont râre savez chal li dimègne ;.
11. Nadine : C'est fwêrt djin.nant... Vosse pôve mame...
12. Alice : Qui volez-v's ? C'è-st-insi parèt... A mons qui...

13. Nadine : Qui kwè ?
14. Alice : Qui vos n'mi monrîz disqua la...
15. Nadine : Ci sèreût-st-avou plêzîr mins dji n'pous nin cwiter, dji ratind l'docteûr...
16. Alice : Po on dimègne ?
17. Nadine : On n'est nin malåde qwand on vout !
18. Alice : Eco vosse bronchite ?
19. Nadine : Bin awè...
20. Alice : C'est l'docteûr Jadoule qui va m'ni ?
21. Nadine : Awè... c'est lu qu'est d'garde !
22. Alice : Tchance èt tot !
23. Nadine : Bin awè...
24. Alice : Moncheû n'est nin chal ?
25. Nadine : Il è-st-èvôye po treûs djoû à Quatar
26. Alice : C'est comique !
27. Nadine : Kwè qu'est comique ?
28. Alice : Moncheû è-st-â Quatar èt c'est vos qui l'a !
29. Nadine : Dj'a kwè mi ?
30. Alice : Bin on catare divins les brontches (*èle rèye*)
31. Nadine : Bin trové ça, bin trové...
32. Alice : C'est drole hin tot l'minme, tot côp qui moncheû 'nnè va po ses afêres, vos r'freûdihez... nin d'tot costé si dj'comprinds bin
33. Nadine : Vos-alez on pô trop long m'sonle-t-i !
34. Alice : Ni v'tracassez nin... Dji sos come les treûs mârcticots : Dji n'veûs rin, dji n'êtins rin èt dji n'dis rin !
35. Nadine : Vos-avez tot a î wangnî !
36. Alice : D'ottant pus' qui dji comprinds madame savez...

37. Nadine : Awè ?
38. Alice : Bin sûr ! Et po v'dire li vrèye, ça n'mi displêreût nin non pus di m'fé visiter par li docteur Jadoule, il est si bèl ome, il a des si bèlès mains, il a...
39. Nadine : Awè, c'est bon insi ! D'ayeûrs, vos n'avez nole bronchite vos !
40. Alice : Bin dj'èl rigrète câsi... Enfin...
41. Nadine : Todis 'nn'è-st-i qui ça m'djin'reût di v'veûye dimorer chal...
42. Alice : Dji m'pous fé tote pitite savez...
43. Nadine : Pitite ou grosse, ine èhale è-st-ine èhale !
44. Alice : Kwè fé adon ?... Oh !, dj'a mutwè ine îdeye !
45. Nadine : Lisquéle ?
46. Alice : Madame mi pôreût mutwè pruster si-auto...
47. Nadine : Vos avez vos' permis ?
48. Alice : Awè ! Dispôye ût djous.
49. Nadine : Ût djoû, c'n'est nin tot plin...
50. Alice : Vos-avez ine omnium !?
51. Nadine : Awè.
52. Alice : D'abôrd, on n'coûre wère di risses
53. Nadine : C'est vos qu'èl dis todis...
54. Alice : Adon, qui fêt-on ?
55. Nadine : Al wåde di Dju parèt... Prindez mi-auto, les clés sont-st-èl couhène...
56. Alice : Merci Madame (*èt èle sôrteye*)
57. Nadine : (*po lèye minme*) Il est grand timps qui dj'm'aprustêye mi... (*èle mousse èl sâle di bagne*)

Bènwèt aparète a li f'gnèsse èt bouhe à cwârê

58. Bènwèt : (*off*) N'a-t-i 'ne sakî ? C'est mi, li vwèzin...

59. Alice (*rintrant avou les clés è s'main*) Vola, on arive (*èle droûve*) Bondjou moncheû Bènèt
60. Bènwèt : Bènwèt èdon, nin Bènèt
61. Alice Por mi, onk' c'est l'ôte
62. Bènwèt : Si vos l'dihez... Mins tot l'minme...
63. Alice Qui pout-on por vos don ?
64. Bènwèt : Dji m'néve veûye si vos volez bin m'pruster vosse fièr a ristinde... li nos' ni tchâfe pus...
65. Alice Mi, dji n'a d'keûre... Dji va d'mander a madame... (*breyant*) Madame ?
66. Nadine : (*off*)Dj'arive...
67. Alice Ele arive
68. Bènwèt : Dj'a-st-oyou, merci
69. Nadine : (*inrant mousseye d'on peignwêr di bagne*) Oh ! C'est vos moncheû Bènwèt
70. Bènwèt : Awè, c'est mi qui v'vint d'mander po pruster vos' fièr a ristinde...Dji m'escusse savez mins li nosse ni tchâfe pus.
71. Nadine : Ça arive èdon... Dinez lî Alice... (*Alice sôrteye*) Vosse feume ristind l'dimègne parèt ?
72. Bènwèt : Nin leye, mi... Dji n'a qui l'sèmedi èt l'dimègne po fé mes ovrédjes parèt... èt come dj'a bouwè îr...
73. Nadine : Bin awè...
74. Alice (*rintrant*) Et vola l'usteye !
75. Bènwèt : Merci co cint còp...
76. Nadine : Dihez moncheû Bènwèt, come vos mètez les mains a tot, vos n'kinohez nin ine sakwè èl plonk'reye par hazard ?
77. Bènwèt : Dj'èl rigrète madame, mins a pàrt li djârdin èt l'manèdje, dji n'sés nin fé grand'tchwè
78. Nadine : Bon. Mètans qui dj'n'âye rin dit.
79. Denise : (*off d'à long*) Bèèè nwèèèèèè...
80. Bènwèt : Awèèè ! C'est Denise qui m'ratind...dji v'lès d'abôrd... Ca torade ou disqu'a

d'main èdon (*i sôrteye et Alice va sèrer l'ouhe*)

81. Alice Pokwè avez-v's dimandé à l'ome s'i n'kinohéve rin a l'plonk'reye ?
82. Nadine : Pace qu'i n'a pus moyin d'avu dèl tchôte êwe po prinde mi bagne
83. Alice Bardaf !
84. Nadine : Pokwè bardaf ?
85. Alice Bin c'est 'ne cata si madame ni s'sét nin laver... I n'a dèss moumints qu'on inme bin d'esse frisse tot l'minme... (*Mouùv'mint d'oumeûr da Nadine*) Volez-v's qui dj'tèlèfone po qu'on v'vinse dépanner ?
86. Nadine : On dimègne !
87. Alice Dji k'nohe in-ome qu'ouveure divins 'ne société qui dispane tot l'minme kwè 7 djoûs so 7 èt 24 eûres so 24 !
88. Nadine : Al bone ?
89. Alice Pwisqui dji v's-èl dis !
90. Nadine : On pout sayî... S'i fèt vite enfin !
91. Alice On va veûye... (*èle prind s'tèlèfone*) Alô Marco ? bin awè... Dis, c'est po-z-avù l'numèrô di wice qui t'ouveûre... Pokwè ? Pace qui l'feume wice qui mi dj'ouveure è-st-en pane... Ah ! c'est twè qu'est d'garde ? (*loukant Nadine*) Eh bin, c'est tos les omes qui com'nèt qui sont djustumint d'garde oûy'... Dj'a dit ça come ça... Vinreus-s' bin rat'mint ?... Rowe dè molin, 69... A l'îdeye... Merci Marco... (*èle racrotche*) Vola, i sèrèt chal divins 5 munutes
92. Nadine : Ouf ! Merci savez Alice, dji v'rivâres çoula.
93. Alice (*fant hilter les clés*) C'est dèdja fèt... Dji va fé sensassion hin mi avou 'ne décapotâbe ! (*èt èle sôrteye po l'hall*)
94. Nadine : Saint Christophe, veuyîz sor leye ! (*on ètind ine auto qui demareye a tchoke pwis qu'ennè va come ine bale*) Dji v's-ennè supleye Saint Christophe, èle ni sârèt nin fé sins vos ! (*èt èle s'assid discorèdjeye mins vola co Bènwèt qui r'vint a li f'gnèsse èt qu'i bouhe*)
95. Bènwèt : Hè la...
96. Nadine : Vola... (*po leye minme*) Quéle sôye !... (*èle droûve, Bènwèt inteure èt l'ouhe dimane à lâdje*) Qu'i n'a-t-i don moncheû Bènwèt ?
97. Bènwèt : Mâdjinez-v's qui dji vins d'm'aporçûre qui vos' fiér è-st-al vapeûr èt dji n'a nin l'êwe qu'i fât... Vos 'nn'ârîz nin par hazard ?

98. Nadine : Probâbe qui sya mins dji n'sés wice qu'Alice èl mète... Assiyez-v's, dji m'vast-aller veûye... *(èle sôrteye èt Bènwèt s'assîd. I veût ine boteye di likeûr so l'bar. I s'dresse, va vès l'bar pwis s'aresteye èt va vès l'fond)*
99. Bènwèt : L'avez-v's trové ?
100. Nadine : *(off)* Nin co *(Bènwèt ricoûrt vès l'boteye, beût on còp et riva s'assîr. Nadine rinteure avou l'êwe)* Vola, dji l'a tot l'minme trové.
101. Bènwèt : A l'îdeye *(mins i n'si lîve nin èt n'prind nin l'êwe)* Vos estez bin savez chal
102. Nadine : Dji n'mi plins nin...
103. Bènwèt : Et come dji veûs, li dimègne à matin, vos inmez bin dè balziner divant di v'moussî
104. Nadine : Çà m'arive awè...manîre di m'diner dè bon timps
105. Bènwèt : *(mostrant l'boteye)* Tot buvant vosse pitite gote
106. Nadine : Oh nèni ! Li boteye est la d'îr al nut... dji n'sâreûs beûre çoula si timpe
107. Bènwèt : Mi, c'est tot l'contrêre, c'èst d'vant l'dîner qui ça m'gosteye li mî...
108. Nadine : Oho
109. Bènwèt : Mins Denise catche les boteyes parèt... Pace qui qwand dji les veûs, dji djêreye dissus come in' SDF so on mitcho...
110. Nadine : *(mâgré leye)* Volez-v's ine gote ?
111. Bènwèt : I n'tinreût qu'a mi... Bin awè la ! *(Nadine èl va chervi)* Moncheû è-st-èvôye lu ?
112. Nadine : Awè
113. Bènwèt : Dji l'a veyou 'nn'aller... Et vosse bâcèle dwème co po l'pu sûr ?
114. Nadine : Nèni, èlè-st-amons s'camarâde
115. Bènwèt : Ooh ! Rindez-m' co eune alez s'i v'plêt... *(èt à moumint qui Nadine èl va chervi, i veût Denise so l'souû)* Bardaf ! *(èt i tchoûke li vère èl main da Nadine)*
116. Denise : *(intran)* Qué novèle don Bènwèt, est-ce po ouy' ? Bondjou savez vwèzène !
117. Nadine : Bondjou
118. Denise : Dji m'dimandéve si vos n'estîz nin en trin dè distiler l'êwe

119. Bènwèt : Bin nona... Dji t'néve on pô k'pagneye a madame... Ele mi d'héve djustumint qu'èle esteût tote seûle po tote li djoûrneye èt qu'ça lî pèsève... Ele n'a nin minme li corèdje di s'moussî èt èle buvéve ine gote po roûvî si d'seûlance...
120. Nadine : Mins...
121. Denise : C'n'est nin bon savez ça... Vos-estez so vôte po dim'ni dépressionêre...
122. Nadine : Ça va aller...
123. Denise : On dit ça ! Savez-v's bin kwè ? Bènwèt a fêt des doreyes à matin... Nos vinrans avou eune po beûre li cafè essonle.
124. Nadine : I n'fât surtout nin v'dèrindjî por mi
125. Denise : Dihez don ! Les vwèzins n'sont nin des tchins tot l'minme... Mins i v'fâret moussî èt n'pus beûre èdon ! Alè Bènwèt, vinez po qu'les banses estessent ristindowes divant treûs-eûres
126. Bènwèt : Dji v'sûs èdon Denise
127. Denise : Passez d'avant mi, c'est pu sûr (*èt Bènwèt 'nnè va sins prinde li bidon d'êwe*)
128. Bènwèt : Qu'a torade insi !
129. Denise : Corèdje, dji sos la! (*i sont fouû*)
130. Nadine : (*Sèrant l'ouhe ètsèrant l'volèt*) Polèt co m'ni, dji n'droûvrès nin... a persone ! Sâf a Simon come di djusse... (*on sone a l'ouhe*) Dèdja lu ? Et dji n'sos nin prête ! (*èle sorteye po aller drovièt*)
(*off*) Bondjou moncheû
131. Marco : (*off*) SOS dépannage madame
132. Nadine : (*off*) Ah ! Intrez moncheû
133. Marco : (*inrant*) Alice m'a dit qui v's'avîz dandjî d'mi
134. Nadine : Bin awè
135. Marco : Qui s'passe-t-i ?
136. Nadine : (*mostrant l'ouh' dèl sâle di bagne*) Ça n'tchâfe pus !
137. Marco : C'è-st-on technicien ou on djône ome virlihe qu'i v'fât ?
138. Nadine : On pô d'sérieû èdon s'i v'plêt !
139. Marco : Eksplikez-v's d'adrame dèmons

140. Nadine : Bon ! Dihans qui dji m'a mǎ ekspliké : Dji n'a pu dèl tchôte êwe è m'sâle di bagne.
141. Marco : Ah ! On va s'occuper d'ça... Et après, si vos v's-anoyez, on pôrèt tot l'minme s'occuper d'ôte tchwè...(i vint po l'fiestî)
142. Nadine : Moncheû, dji v'sè preye !
143. Marco : Mande escusse savez madame... C'est l'âbitude... Qwand 'ne bèle pitite feume mi ratind pô mousseye come vos l'estez, c'est qu'èle a dandjî d'on p'tit extra.
144. Nadine : Bin mi nin ! Et si dji sos pô mousseye, c'est qu'dj'alève prinde mi bagne mins dji n'a nin dèl tchôte êwe !
145. Marco : Bah ! Ine pitite freûde douche, ça ravigote nèni ?
146. Nadine : Moncheû, dji sos prèsseye !
147. Marco : Bon, bon... On î va... Wice èst-ce qui ça s'passe ?
148. Nadine : Sûvez-m' mins wârdez vos mains d'vins vos potches
149. Marco : (*sûvant Nadine*) Ci sèrèt malâheye po-z-ovrer savez...

Ì sont-st-a hipe sôrtou qu'on sone a l'ouhe d'intreye

150. Nadine : (*arivant*) Vola, vola, dj'arive... (*èle va è colidôr*)
151. Bènwèt : (off) C'est co 'ne feye mi
152. Nadine : (off) Bin dj'èl veûs la...
153. Bènwèt : (*intran*) Mins dji n'fès qu'd'intrer èt sôrti savez
154. Nadine : Ah bon...
155. Bènwèt : M'a bin falou m'ni po li d'avant la qui l'volèt èsteût séré
156. Nadine : Dji m'alève moussî
157. Bènwèt : (*ryant*) Come Denise vis l'aveût consi...
158. Nadine : A perpos vos, vos m'avez fê passé po 'ne bèle dilé vosse feume...
159. Bènwèt : Mande escusse mins c'esteût po n'nin m'fé barboter
160. Nadine : Ele vis barbote ?

161. Bènwèt : Pus sovint qu'a s'toùr... por qwand les ovrèdjes ni s'fèt nin
162. Nadine : Ele ni fèt nin grand' tchwè mi sonle-t-i ?
163. Bènwèt : Sya savez... Ele louke çou qu'dji fès èt m'dit kimint qu'dji deûs fé...
164. Nadine : Si vos m'leyahîz moussî asteûre ?
165. Bènwèt : Awè dê... Dj'esteûs djusse vinou rikwèri l'êwe qui dj'aveûs roûvi torade (*il apougne li bidon à moumint qu'on ètind de brut èl sâle di bagne*) I n'a 'ne sakî qu'est m'nou po v's-êdî a v'moussî ?
166. Nadine : C'est l'plonkî qu'est la pace qui dji n'a pu dèl tchôte êwe !!!
167. Bènwèt : Ah c'est po ça qui torade, vos m'avez d'mandé...
168. Nadine : (*a bout*) Awèèè
169. Bènwèt : Bon, bon... dji m'sâve... Dji clap'rès l'ouhe podrî mi... (*i sôrteye*)
170. Nadine : Ouf ! (*a l'ouhe dèl sâle di bagne*) Est-ce qui ça va Moncheû?
171. Marco : (*intrans*) Polez m'loumer Marco, c'est mî qu'moncheû !
172. Nadine : Mins c'est familière !
173. Marco : Si pô pwis les « moncheu », ça m'djin.ne
174. Nadine : Bon parèt... Est-ce qui ça va Marco ?
175. Marco : Nin âheye, nin âheye...
176. Nadine : Vos-î ariv'rez tot l'minme ?
177. Marco : On va veuye... Vosse tchôdîre è-st-èl câve ?
178. Nadine : Awè... deuzinme pwète di hintche, a dreûte è colidôr
179. Marco : (*avou les moûv'mints*) Colidôr..., a dreûte..., deûzinme a hintche... Compris ! (*i sôrteye*)
180. Nadine : Pacyince ! pacyince ! Dji va tot l'minme prinde on calmant... (*èle va è s'tchambe*)

A pon.ne è-st-èle sôrteye qui Sonia arive de colidôr

181. Sonia : Mame ? Mame ?

182. Nadine : (*rim 'nant*) Sonia ? Qui fez-v's chal don ?
183. Sonia : Ni sos-dj'dju nin è m'mohone ?
184. Nadine : Bin sya mins... ni d'vîz-v's nin d'morer amons Quentin disqu'a l'nut' ?
185. Sonia : Sya mins on s'a disputé.
186. Nadine : Bardaf !
187. Sonia : Come vosl'dihez
188. Nadine : D'ou vint v's-avez-v's disputé?
189. Sonia : I m'énergève !
190. Nadine : Et qu'alez-v's fé ?
191. Sonia : Sés rin... bardouhî è m'tchambe...
192. Nadine : Vos-alez d'mani chal ?
193. Sonia : Wice îreûs-dje ?
194. Nadine : Dji n'sés nin mi... mins d'morer ressèrèye, a vost'adje...
195. Marco : (*rarivant dèl câve*) Vola, dj'a trové çou qu'n'alève nin... Ooh, bondjou mam'zèle...
196. Sonia : Moncheû
197. Nadine : Tot è-st-arindji ?
198. Marco : Dji va l'arindji... mins dj'enn'a bin po ine eûre
199. Nadine : Ine eûre ? Mins c'n'est nin possipe ! Fât qu'dji m'lave mi !
200. Marco : Estez-v's si mâsseye qui çoula ? (*Nadine hosse les spales*)
Bon. Dji va kwèri çou qu'i m'fât è m'camionète... Dji pous leyî l'ouhe à lådje po fé mes convôyes ?
201. Nadine : (*Alant r'drovièt l'volèt èt li f'gnèsse*) Alez por chal, vos-ârez pus-âheye
202. Marco : Aussitôt dit, aussitôt fêt ! (*èt i sôrteye*)
203. Sonia : Qui est-ce ?
204. Nadine : On dépaneûr... I n'a pu d'tchôte êwe èl sâle di bagne
205. Sonia : Et v's-avez fêt m'ni l'ome po on dimègne ?

206. Nadine : Dji m' divève laver !
207. Sonia : Tot l' minme !
208. Marco : (*rintrant avou on gros cofes âs-usteyes*) Dji passe mins dji va co sûr rapasser
209. Nadine : Tot çou qu' dji v' dimande, c' est di v' dispêchî !
210. Marco : Dji n' a nin l' feû a cou mi sonle-t-i mins si vos, vos l' avez, leyîz m' vis dire qui vos n' sârîz nin minme vis rêwer ca dj' a côpé les êwes (*èt i r' va vès l' cève*)
211. Nadine : Et vos volez d' mani divins on bazâr come i n' a chal vos ?
212. Sonia : Qui freûs-dje bin d' ôte ?
213. Nadine : Pokwè 'n' tèlefonez-v' s nin a Nathalie ?
214. Sonia : Po dire kwè ?
215. Nadine : Po-z-aller fé on toûr avou leye par egzimpe
216. Sonia : Wice ?
217. Nadine : Vos m' djâsîz d' on film les djoûs passés... Eh bin si vos volez, dji v' pâye l' intreye a totes les deûs èt dji v' donrès co des çances po-z-aller dîner d' vant èt minme soper après.
218. Sonia : Vo v' la bin midone tot d' on côp !
219. Nadine : Bin... dji m' fê mâ d' vos... la qu' c' est margaye avou Quentin ... (*tilt*) èt pwis come ça vos lî mosteurrez qui vos savez bin v' s- amûzer sins lu, na !
220. Sonia : Bone îdeye ! Dji m' va tèlefoner a Nathalie... Merci mame (*èle mousse è s' tchambe*)
221. Nadine : (*creuh' lant les deugts*) Pourvu qu' Nathalie seûye d' akwêrd !

Marco rarive dèl cève

222. Marco : C' est bin çou qu' dji pinsève... C' è- st- ine vane qu' est capoute
223. Nadine : Vos aller poleur èl rimplacer ?
224. Marco : Si dj' enn' a eune è m' camionète awè
225. Nadine : Et si vos 'nn' avez nin ?

226. Marco : Dj'îrès à botique demain a l'prumîre eûre
227. Nadine : Et m'bagne mi ?
228. Marco : Ci sèrèt po d'main ossi !
229. Nadine : Bardaf !
230. Marco : Vos n'alez tot l'minme nin v'mète al dibâtche pace qui vos pass'rez on djoû sins bagne
231. Nadine : C'est qu'dji ratind l'docteûr !
232. Marco : Ah bon ! Adon c'est normâl qu'i fât laver ôte tchwè qui çou qu'on veût
233. Nadine : Dji n'vis-èl fêt nin dire
234. Marco : Espérans qui dj'a çou qu'i fât insi ! (*èt i sôrteye*)
235. Nadine : (*riprind si GSM po on novê mèsèdje*) Mi p'tit tchou, dj'a pris d'l'astådje èt ça m'arindj'reûs qui vos n'vinrîz qui d'vins ine eûre... ou 2. Dji v's-eksplikrès. Bâhes tot avâ...

Et vo r'la co Bènwèt

236. Bènwèt : Come li hapâ est r'drovièt, dji ramousse por chal
237. Nadine : Qu'avez-v's co roûvi ?
238. Bènwèt : Rin... Dji vins trover l'plonkî
239. Nadine : Il è-st-è s'camionète, vos n'l'avez nin veyou ?
240. Bènwèt : Nona... Mins c'est normâl èdon : Si camionète è-st-è l'aleyè a dreûte dèl mohone et come mi, dji vins d'hintche...
241. Nadine : Bin vos savez bin wice qu'il est insi
242. Bènwèt : Awè mins dj'inme ottant dèl ratinde chal (*i s'assîd èt louke li boteye*)
243. Nadine : (*èle a compris mins ni bronche nin*) Come vos volez ...
244. Bènwèt : Mådjinez-v's èdon qu'i n'a 'ne sicrâwe dèl plantche a ristinde qu'est dislâkeye èt dji n'a nin l'clé qui fât po l'rissèrer... L'ome a mutwè ça èdon lu ?
245. Nadine : Sés rin don mi... (*A Marco qui rinteûre avou on tuyô*) Bin vol' la djustumint, dimandez lî

246. Marco : C'est d'mi qu'on djâse ?
247. Nadine : Awè, c'est l'vwèzin qu'a dandjî d'ine usteye... Avez-v's trové çou qu'i v'faléve ?
248. Marco : Dji n'a nin l'vane mins dji va tot l'minme èmantchî 'ne sakwè qui tinrèt disqu'a d'main... Come ça, vos sèrez prôpe divins totes les cwènes po r'çûre li docteur.
249. Bènwèt : Vos ratindez l'docteur ?
250. Nadine : Awè
251. Bènwèt : Vos-estez malåde ?
252. Nadine : Si dj'a fês m'ni l'docteur...
253. Bènwèt : Rin d'grâve ?
254. Nadine : Nèni...
255. Bènwèt : Qui vos d'hez enfin... ca qwand on fêt m'ni l'docteur li dîmègne, ci n'est nin sovint po 'ne tchîcheye..
256. Nadine : Mâdjinez-v's qui dj'a r'freûdi èt qui dji tosse...
257. Bènwèt : Ine mâle tosse ?
258. Nadine : Dj'a sogne qu'èle ni d'vinse mâle ca dji so-st-assez flâwe des brontches veyez-v's...
259. Bènwèt : Dji veûs, dji veûs...
260. Nadine : Vola, c'est tot simpe
261. Bènwèt : Oh bin ça s'arindj'rèt vite ca c'est nos'docteur qu'est d'garde... Et c'è-st on bon savez... I prind d'l'adje mins l'est todis fwêrt capâbe
262. Nadine : Dj'ennè dote nin
263. Bènwèt : Et dj'enn'a les prouves ! Mâdjinez-v's qu'on djou...
264. Nadine : Ci n'est nin qui dji n'vis vous nin hoûter savez mins l'ome chal ratind qui vos lî d'héz' çou qu'i v'fât
265. Bènwèt : Awè c'est vreye... Dihez moncheû... Moncheû k'mint ?
266. Nadine : Marco
267. Marco : Doucemint ! Marco, c'est po les feumes... Sinon, c'est Marc Lambion !

268. Bènwèt : Come vos volez... Dihez moncheû Lambion est-ce qui vos n'mi vôrîz nin pruster 'ne clé po r'sèrer li s'crâwe di m'plantche a ristinde s'i-v'plêt ?
269. Marco : Di k'bin ? Dih, onze, doze ?
270. Bènwèt : Avou eune dj'a-st-assez èdon
271. Marco : Dji m'è dote mins quéle groheûr vis fât-i ?
272. Bènwèt : Sés rin...
273. Marco : Vinez avou mi èl câve, dji v'va d'né m'djeû...
274. Bènwèt : Dji v'sûs ?
275. Marco : Bin awè (*i sôrtèt tos les deus*)
276. Sonia : (*vinant foû di s'tchambe*) Vola, Nathalie est dakwêrd. Ele sèrèt prête divins ine dimeye eûre... èt mi ossi
277. Nadine : A l'ideye !
278. Sonia : I v'va faleûr moussî ossi
279. Nadine : Pokwè mi ?
280. Sonia : Ci n'est nin vos qui nos va miner ?
281. Nadine : Po v'dire li vreye, dji n'sâreûs
282. Sonia : D'ou vint ?
283. Nadine : Mi-ôto n'est nin chal
284. Sonia : Et wice è-st-èle ?
285. Nadine : Dji l'a prusté a Alice
286. Sonia : A Alice ????
287. Nadine : Awè, si mame est prête a rinde l'âme...
288. Sonia : Tchance èt tot si l'ôto n'fêt nin pareye...
289. Bènwèt : (*Rarivant avou on djeû d'clés*) Vola, dj'a çou qu'i m'fât... Oh ! Sonia ! Vos-estez rimnowe parèt ?
290. Sonia : Awè mins po mî r'sôrti.

291. Bènwèt : Avez-v's vrinmint dandjî d'èco 'nn'aller ?
292. Nadine : Pokwè d'man'reût-èle rèssèreye don ?
293. Bènwèt : Nin question di s'rèssèrer mins po d'mani d'lé vos
294. Nadine : Dji sos vîle assez po tirer m'plan tote seûle savez
295. Bènwèt : Awè mins...
296. Nadine : Mins kwè ?
297. Bènwèt : Si vos d'vez aller à farmacyin, vos riskey'rez dè r'tcherdjî vosse freûd
298. Sonia : Qué freûd don ?
299. Nadine : (*a pârt*) Bardaf !
300. Bènwèt : Vosse mame ni v's-a rin dit mins èle a 'ne dimeye bronchite èt èle a fêt m'ni l'docteûr... Mins ni v'tracassez nin, s'i fât, dj'îrès mi à farmacyin
301. Denise : (*Off*) Bèènwèt
302. Bènwèt : Rapèl a l'ordre ! Dj'î va mins si vos avez dandjî d'ine sakwè, breyez on còp èdon....
303. Nadine : Dji n'mâkrès nin
304. Bènwèt : Dj'î compte bin (*ennè va*)
305. Sonia : Vos-avez houki l'docteûr ?
306. Nadine : Bin nona !
307. Sonia : Qui raconte-t-i la d'docteûr èt d'farmacyin adon ?
308. Nadine : Qui sés-dje don mi ? Il a sondji ou il est sô... Il a m'nou torade qu'il esteût d'dja hiné èt i m'a co bu ine dimeye boteye di likeûr...
309. Sonia : Bin va... Di tote manîre, dj'ennè va nin...
310. Nadine : Mins siya qu'vos 'nn'alez !
311. Sonia : Kimint don mi ?
312. Nadine : Dji va d'mander à plonkî di v'miner
313. Sonia : I vôrèt bin ?
314. Nadine : Dji va m'arindjî, n'ayîz' nole sogne !

315. Sonia : Dji m'va-st-apruster d'abôrd (*èt èle riva è s'tchambe dismètant qui Nadine va brêre après Marco*)
316. Nadine : Marco ? Vinez-on pô...
317. Marco : (off) Dj'arive... (*Nadine si chève ine gote dèl likeûr pwis Marco inteure*) Vos-estez presseye mins fât qu'dji m'distèle a tot côp bon...
318. Nadine : I n'a qu'po 'ne munute...
319. Marco : Dji v'hoûte adon ?
320. Nadine : Qwand v's-ârez fini èdon, dj'inm'reûs bin qui vos m'fahîz on grand plêzîr...
321. Marco : Dji m'ennè dotéve... (*alant sor leye*) Tot a vosse disposicion èdon bèle dame
322. Nadine : Ah mins ci n'est nin po çou qu'vos pinsez....
323. Marco : C'est pokwè adon ?
324. Nadine : Dji vôreûs bin qui vos minahîz m'feye amons ine camaråde
325. Marco : Dihez madame, dji v'vous bin dispaner come plonkî mins nin come bone d'èfant tot l'minme.
326. Nadine : Ci n'est nin in-èfant, c'è-st-ine bâcèle di saze ans... D'ayeûrs vos l'avez veyou torade...
327. Marco : C'esteût vosse feye ? Vos l'avez-st-avou fwêrt djône insi
328. Nadine : (*tote fire*) Eco pu djône qui vos n'pinsez...
329. Marco : Bon... Ine sakî frèt çou qu'i pôrèt
330. Nadine : Merci Marco... mins atincion èdon, nin des manîres âtou d'leye !
331. Marco : Wice alez-v's don ? Dji n'pous sûr bin mâ... D'ayeûrs, dji n'm'intèresseye qu'às feumes qu'ont 'ne bone expéryince di l'årtike ! (*èt i r'va èl câve*)
332. Nadine : Bin va ! (*alant drovièt l'ouhe dèl tchambe da Sonia*) Vola, tot è-st-arindji... Dji m'va-st-apruster çou qui dji v's-aveûs promètou
333. Sonia : (*off*) comptez todis deus cints euros
334. Nadine : Deus cints ? Deus cints parèt... (*èt èle va-st-è s'tchambe*)

Li sin.ne dimane vûde on moumint pwis on ètind ariver ine ôto reud a bale pwis des pneûs qui crinèt. Li moteûr s'aresteye, ine portière clape èt Alice arive al pwète fignèsse. Ele mousse.

335. Alice : Todis l'ouhe à lådje chal pwis on s'èwarrèt qu'on a m'nou haper (*èle sère l'ouhe qui clape. Nadine adâre*)
336. Nadine : Alice ? Qui s'passe-t-i ?
337. Alice : Rin madame... Dj'esteû-st-èvôye sins m'sacoché èt come di djusse sins papîs... Adon, dj'a fê d'meye tour...
338. Nadine : Ah bon ! Vos 'nnè raler !?
339. Alice : I n'fât nin ?
340. Nadine : Sya, sya !
341. Alice : Mins d'avant, dji m'va dire bondjou a Marco... Dj'a veyou qui s'camionète esteût co todis chal... Wice è-st-i ?
342. Nadine : El câve.
343. Alice : Dji hinds deûs munutes
344. Nadine : Come vos volez (*et èle mousse è s'tchambe*)

Mins Marco ramonte djustumint avou ses usteyes

345. Alice : Oh bin dji m'va spâgnî 'ne vôle la qu'dji t-alève trover ! Salut vî strouk ! (*èle li strouke pwis èle li bâhe*)
346. Marco : Et kwè gueugueûye, kimint va-t-i d'pôle îr
347. Alice : L'a d'dja stu pu mâ ! Dji fês l'pèteûse avou l'cabriolet da madame
348. Marco : Bin va !
349. Alice : Fâreût veuye li janre qui dj'a...
350. Marco : Po ça, dj'ennè dote nin
351. Alice : Vins' fé on toûr avou mi ?
352. Marco : Dji n'a nin l'timps et pwis, dji m'troûve co trop djône po mori
353. Alice : Bodje-tu va ! Dj'a m'permis hin ?
354. Marco : Weye mins fât creûre qui t'as fêt 'ne fameûse clignète a l'egzamineûr

355. Alice : Çà !... D'ayeûrs c'est twè minme qui l'a dit hin !
356. Marco : Kwè heye ?
357. Alice : Qu'on-z-alève pu long avou s'cou qu'avou s'tiesse ! (*et i hah'lèt tos les deûs*)
358. Marco : C'est bon dè rire mins dj'ouèveure mi chal... W'è-st-èle li dame ? Bèle feume ente parentèse !
359. Alice : Trop fin bokèt po t'grognon valèt !
360. Marco : Entendre, ce n'est pas voir ! Alè, houke lu !
361. Alice : (*alant bouhî al pwète dèl tchambe*) Madame, i n'a Marco qui v'houke... (*a Marco*) Dji m'rafeye dè veyî t'janre avou leye !
362. Nadine : (*intransant tot souk'*) Vos-avez dandjî d'mi Marco ? (*èwarâcion da Alice*)
363. Marco : Bin vola madame, ça a stu pus vite qui çou qu'dji n'pinsève...
364. Nadine : Ouf ! Vos-estez in-ome to toute. Dji v'rivâres çoula !
365. Marco : Si vos volez alez veuye qui tot va...
366. Nadine : So l'côp èdon Marco! (*èt èle va èl sâle di bagne*)
367. Alice : Marco ci, Marco la... Qui lî as-s' fêt don ?
368. Marco : Si on t'èl dimande, dis qu'ti n'sés rin !
369. Alice : Weye, weye !
370. Nadine : (*rintransant*) Vola tot rote a l'lecsion. Vos-estez-st-in'as !
371. Alice : On fameûs has' awè !
372. Marco : La d'sus, dji n'a pus qu'a 'nnè raler èt èminer vosse feye tot d'on côp
373. Nadine : C'est binamé d'vosse pâr
374. Alice : Sonia est chal ?
375. Nadine : Awè mins èle va-st-aller à cinéma
376. Alice : Co bin sinon... bardaf !
377. Nadine : Awè c'est bon ! (*a Marco*) Dji houke mi feye èdon
378. Marco : Fez a voste âhe

379. Nadine : *(a l'ouhe da Sonia)* Sonia ? Vos' tchâfeû v'ratind
380. Sonia : *(off)* Vo m'chal *(intrans)* Dji sos prète ! Oh bondjou Alice
381. Alice : Sonia... Ça va ? Quentin ossi ?
382. Sonia : Qu'on n'mi djâse surtout pus d'lu !
383. Alice : Ça, c'è-st-on conte qui n'deur'rèt qui disqu'a d'main
384. Nadine : Vos k'dûrez bin Marco disqu'a mons Nathalie ?
385. Sonia : Dji n'sos nin sûre
386. Marco : V's-avez l'adresse ?
387. Sonia : Normâl !
388. Marco : Assez. Li GPS frèt l'resse ! Î estan-gn' ?
389. Sonia : Munute ! Man, èt les p'tits bilèts ?
390. Nadine : *(èle èlz'a èl potche di s'pègnwêr)* Tinez gâté djône
391. Sonia : *(rabressant Nadine)* Merci èt qu'a torade... Qu'a d'main Alice
392. Alice : Plêhez-v's bin
393. Sonia : Merci *(a Marco)* Vinez-v's tchâfeû ?
394. Marco : Dji v'sûs mi *(èt i sôrtèt tos les deûs)*
395. Alice : Ci côp chal, dji prinds m'sacoche èt dj'ennè va ossi
396. Nadine : Prindez astème èdon
397. Alice : Tofèr èdon madame *(èt èle sôrteye ossi)*
398. Nadine : *(Après aveûr seré l'ouhe)* Enfin tote seûle... Mins dji n'sos nin co laveye ni mousseye... Mins dj'a co ine eûre divant mi *(èt tot tarlatant, èle va vès l'såle di bagne mins ossi vite on sone a l'ouhe di d'vant)*
Bardaf ! I n'ârèt nin avou m'dinrin mèssédje... Tant pé vå... *(èt èle va po drovièt)*

On mådjine l'ouhe a hipe droviète qu'on ètind brêre Pauline

399. Pauline : *(off pwis in)* Wice è-st-i mi-ome qui dji lî mosteure qui dji sés bin qui dj'sos wyinme

400. Nadine : (*sûvant*) Enfin madame, qui v'prind-t-i ?
401. Pauline : Vos, ni fez nin l'ènocin.ne ! Si v'n'estez nin mousseye, dji sés bin qui c'est pace qui vos v'dinez dè bon timps avou Simon !
402. Nadine : Qué Simon don ?
403. Pauline : Simon Jadoule qui n'est nin seûl'mint vos' docteur mins vos' galand !
404. Nadine : Prumîre di mes novèles !
405. Pauline : Provez-m' qu'i n'est chal d'abôrd !
406. Nadine : V's-avez veyou si-ôto ?
407. Pauline : Il est bin trop malin qui po m'ni disqu'a chal avou si-ôto.
408. Nadine : C'est nos' docteur...
409. Pauline : Nin on dimègne qui n'est nin d'garde !
410. Nadine : Adon, dji v'vas fé visiter totes les plèces dèl mohone
411. Pauline : Al bone ?
412. Nadine : A cop sûr !

A c'moumint la, on ètind li brut d'in-accidint (ine ôto disconte in-âbe)

413. Nadine : Bardaf !(*èle va don côp vès li f'gnèsse qu'èle droûve*)
414. Pauline : Kwè bardaf ?
415. Nadine : Vos n'avez nin oyou l'accidint nèni ?
416. Pauline : Bèle afêre, i n'a tos les djous
417. Nadine : Mins dj'wadje qui c'est mi-oto ! (*loukant*) Bin awè, c'est leye
418. Pauline : Bin fêt por vos !
419. Nadine : Ognèsse èdon s'i v'plêt !
420. Pauline : Dji m'va djin.ner mutwè !
421. Alice : (*arivant tot tchoûlant*) Oh madame...

422. Nadine : Qu'avez-v's fêt don ?
423. Alice : Dj'a roûvi dè mète li marche arrière èt i n'aveût in-âbe divant mi...Mins lu i n'a rin dismètant qu'l'ôto..hou hou..
424. Nadine : Djan rimètez-v's... Vos n'estez nin blesseye c'est l'principå... et pwis come vos l'avîz dit torade, dj'a ine omnium èdon...
425. Alice : C'est vreye ! Vos n'm'ennè volez nin insi ?
426. Nadine : Dji n'va nin dire qui dji sos contin.ne mins dji n'vis ennè tinrè nin rankeune
427. Alice : Oh merci madame ! (*èle aporçût Pauline*) Oh ! Vos n'estez nin tote seûle... Qui est-ce ?
428. Nadine : C'è-st-ine dame qui vint sout'ni qui dji sos l'crapôde da si-ome
429. Alice : Ooh ! (*pwis sins reflèchi, sitindant l'main a Pauline*) Bondjou savez madame Jadoule !
430. Nadine : Bardaf !

Ridô !!

DEUZINME AKE

On p'tit timps s'a passé. Nadine èt Alice sont la avou Pauline qu'è-st-assîte...

431. Nadine : Pwisqui vos-avez visité totes les plèces dèl mohone disqu'a nah'ter divins les gârdirôbes, dj'a l'èpinse qui v's-avez l'acertinance qui voste ome n'est nin chal
432. Pauline : Awè.
433. Nadine : Adon pokwè volez-v's a tot pris dimani stampeye chal ?
434. Pauline : Pace qu'i n'est nin èl mohone èt qu'dj'a l'acertinance qu'i va m'ni, timpe ou târd... Adon, dji rawåde po lî prover qui dji sés bin di kwè qui r'toûne !
435. Nadine : Mins qu'est-ce qui v'fêt pinser qui voste ome mi vint veûye ?
436. Pauline : Les SMS qui li « p'tit tchou » riçut ! Totes les proûves sont-st-è s'tèlèfone qu'i a roûvi dè prinde avou lu la qu'i n'fève nou bin po sôrti!
437. Nadine : Et les SMS, c'est mi qui les èvoye mutwè ?
438. Pauline : C'è-st-ine Nadine
439. Alice : N'a pu d'on tchin qu'on lome Picârd !
440. Pauline : Awè mins èl lisse di s'pacyintèle, i n'a qu'ine seûle Nadine qui ravisse a 'ne sakwè ! Enfin dji vous dire qui n'est ni vîle ni lède
441. Nadine : Merci por mi !
442. Pauline : Et po r'hazi l'clâ, i n'a mam'zèle chal qui m'a loumé madame Jadoule... Mi dîrîz-v's bin pokwè ?
443. Alice : Pace qui... Pace qui dji v's-a rik'nohou alez !
444. Pauline : C'est d'dja bon èdon, on n's'a mâye veyou !
445. Alice : Nèni mins dj'a veyou vos' portrêt !
446. Pauline : Et wice don ?
447. Alice : So l'burô dè docteur !
448. Pauline : Vos estez eune di ses pacyinte ?

449. Alice : Nin po dire mins dji l'a stu veuye ine feye la qui ça m'gative (*tot d'hant çoula, èle passe les deus mains so si stoumac disqu'à d'zos di s'vinte*)... (*èt come Nadine li tape on mètchant còp d'ouy*) èl gorge èt è bûzê.
450. Pauline : Et vos-avez veyou mi portrêt so l'burô da Simon ?
451. Alice : Tot come dji v'veûs !
452. Pauline : Dji n'a nin l'som'nance di çoula
453. Alice : Mi, si dj'esteûs mariyeye èt qu'dj'âreûs m'portrêt so l'burô da mi-ome, dji n'mi mådjin'reûs nin qu'i va veûye ine ôte ca mostrer s'feume insi a tot l'monde, dji trouve qui c'est-ine prouve d'amour.
454. Pauline : Et qwand avez-v's veyou c'portrêt la ?
455. Alice : Bin... li samin.ne passeye
456. Pauline : Dji sèreûs todis curieûse dè veûye ça
457. Alice : Vos n'divrîz nin avu malâheye di v's-ennè rinde compte, tot dreût minme si vos volahîz... Ça v'rindreût mutwè pu pâhûle...
458. Pauline : Vos-avez rêzon... Dj'î va ! Mins si m'portrêt n'est nin so l'burô, dji raplike tot fî dreût ! (*èle ènnè va po l'fond èt on ôd claper l'pwète*)
459. Alice : Qui di-st-on a li p'tite Alice qui vint di v'dishaler dèl tigneûse ?
460. Nadine : (*pawoureûse d'esse djalote*) C'est vreye qui Simon a s'portrêt so s'burô ?
461. Alice : Qui sés-dje don mi, dji n'a mâye situ è s'cabinèt
462. Nadine : Mins adon, èle va rimni !
463. Alice : Mins d'avant, nos-ârans avou l'timps d'ekspliquer l'afêre a Simon po qu'èle ni tome nin d'sus
464. Nadine : Djusse !
465. Alice : Tot ratindant, è vosse plèce, dji m'îreûs moussî... Minme sins v'laver ca kwè qu'il arive, i n'ârèt tot l'minme nin des fiki-fiki ouy'
466. Nadine : Dji creûs qui vos-avez rêzon... (*alant vès s'tchambe*) C'est tofèr insi qwand on s'rafeye trop' (*èle sòrteye*)
467. Alice : Dji l'a todis dit hin mi : in-ome, passe co, mins deûs, « bonjour la galère ! »

Et vochal co Bènwèt. I bouhe on p'tit còp a li gnèsse èt il inteure. Alice a potchi è l'êr.

468. Bènwèt : Ci n'est qu'mi !
469. Alice : Vos m'avez fèt sogne vos moncheû Bènèt
470. Bènwèt : Eco todis Bènèt ! Vos-avez onk' di ces makèts !
471. Alice : C'est çou qu'tot l'monde m'a todis dit
472. Bènwèt : Ça n'mèware nin...Mins vos d'vrîz-st-aprinde a fé dès èfòrts ... Mins po çou qu'dj'ennè dis (*èt vola qu'i vout 'nnè raler pwis s' ravise*) Oho !Dji m'néve po rapwerter les clés
473. Alice : C'est di d'chal ça ?
474. Bènwèt : Di d'chal mins nin des djins di d'chal
475. Alice : Vos ossi m'sonle-t-i, vos d'vrîz-st-aprinde a fé des èfòrts !
476. Bènwèt : Mi ? Pokwè don ?
477. Alice : Po-z-aprinde a v's-ekspliker d'adrame
478. Bènwèt : Dji n'a rin dit d'contràve mi
479. Alice : Nèni hin, c'est di d'chal tot n'estant dès djins di d'chal... C'est clér hin ça !
480. Bènwèt : Tot a fèt! Dji les a m'nou cwèri chal mins dilé l'plonkî èt dji vins po l'zî rapwerter
481. Alice : I n'est pu chal !
482. Bènwèt : Bardaf ! Vola, cåse di Denise qui m'a dit qui dj'aveûs l'timps dè r'fé les léts divant di les rapwerter, l'ome va-t-èsse è l'imbaras s'i deût aller ovrer ôte pâ... Sins compter qu'i m'va mutwè prinde po on voleûr...
483. Alice : Pokwè hap'rîz-v's on djeû d'clés don ?
484. Bènwèt : Hè ! Dji n'sèreûs nin l'prumîr qui hape des usteyes po les r'vinde so 'ne brocante ou l'ôte...
485. Alice : C'est co vreye
486. Bènwèt : Veyez-v's pa !
487. Alice : Ratindez, dji lî va téléphoner
488. Bènwèt : Vos-avez s'numèrô ?
489. Alice : Po lî téléphoner, c'est pus-âheye ! (*èle prind si GSM*) ... Dis Marco, t'es rèvoye sins les clés qu't'aveûs prusté à vwèzin.... Rimni ? Pokwè rimni ?... Ah bon...

Nèni... dji sèrès chal... Damadje ? Pokwè damadje ?... Bodje tu va blablam... C'est bon ! Qu'a torade.

490. Bènwèt : C'è-st-onk di vos camaråde mi sonle-t-i ?
491. Alice : Awè
492. Bènwèt : C'est mutwè pus' qu'on camaråde ?
493. Alice : S'i n'aveût des pris po les curieûs, vos sèrîz sûr nominé vos !
494. Bènwèt : Mètans qu'dji n'âye rin dit... Il aveût dandjî des clés èdon ?
495. Alice : Dji n'sés nin.
496. Bènwèt : Pwisqu'i va rimni
497. Alice : Awè mins po fé siner li papî come kwè il aveût m'nou ovrer
498. Bènwèt : Ah bon ! Dji v'pous tot l'minme leyî les clés insi ?
499. Alice : Come di djusse
500. Bènwèt : Bin vo les la insi...
501. Alice : Merci. Qu'alez-v's fé asteûre ? Prinde les poûssîres, laver l'mohone, cirer les solés ?
502. Bènwèt : Dji n'a nin fini dè ristinde...
503. Alice : (*èl tchoûkant fouû*) Haye insi moncheû Bènwèt
504. Bènwèt : (*sórtant*) Bènwèt, Bènwèt, pokwè todîs Bènwèt ?...
505. Alice : (*si leyant toumé d'vins on fôteûye*) Oufti quéle djourneye !
506. Nadine : (*rintrant ; èle est mousseye*) Tins, vos-estez tote seûle ?
507. Alice : Bin awè.
508. Nadine : I m'sonléve portant aveûr oyou djâzer
509. Alice : C'esteût l'vwèzin
510. Nadine : Quéle sôye ! Qui lî faléve-t-i co don ?
511. Alice : L'a rapwerté les clés da Marco
512. Nadine : Qu'est revôye lu...

513. Alice : Mins qui va rim'ni
514. Nadine : Po kwè fé ?
515. Alice : I dit qui c'est po v'fé siner on papî mins a m'sonlon, c'est po ôte tchwè...
516. Nadine : Po kwè ?
517. Alice : Dj'ôds bin qu'il a-st-îdeye di v'sitrinte divins 'ne cwène
518. Nadine : Wice alez-v's don ?
519. Alice : Ah ! A l'oyi, tot wice qu'i va, il arive a stron.ner l'poye sins l'fé brêre
520. Nadine : Ci n'sèrèt nin l'cas chal todis
521. Alice : Mutwè pace qui vos avez mî d'zos l'main ?
522. Nadine : Awè, c'est d'dja bon !
523. Alice : C'est po rire èdon
524. Nadine : Creyez-m', dji n'a wêre l'îdeye dè rîre savez..
525. Alice : N'a pé èl veye hin madame...

Vola co Bènwèt a li f'gnèsse mins dilé lu, i n'a-st-ine bâcèle (Julie) coviète di « percing » èt d'tatouwèdjès èt qui a l'aparance, est so ses dinrins moumints

526. Bènwèt : (*intransit tot seû*) Mandé escusse savez mins est-ce qui l'docteur est dèdja m'nou ? (*côp d'ouy' d'èwarâcion d'Alice vès Nadine*)
527. Nadine : Nèni, nin co
528. Bènwèt : Ça tome bin ! (*pwis podrî lu*) Vinez mam'zèle...(Julie inteure)
529. Alice : Kwè-z-est ça don ?
530. Julie : Ça ? Douc'mint, dji sos 'ne djin tot l'minme !
531. Alice : Mandé escusse, ça m'a hipé
532. Julie : Adon ça va... Dji m'pous assîr ?
533. Nadine : A...awè... Moncheû Bènwèt, qui s'passe-t-i ? Eksplikéz-v's !
534. Bènwèt : Bin qwand dj'a sôrtou di d'chal torade èdon, la qui dj'aveûs m'nou rapwerté les clés d'â plonkî qui n'esteût pus chal mins qui va rim'ni pace qui...

535. Alice : Çà va madame è-st-â corant !
536. Bènwèt : Ah bon ! Dji d'héve don qui tot sôrtant, dji veûs qu'i n'a 'ne feume qu'è-st-assîte è vost'ôto èt qu'èle a 'ne bosse...
537. Julie : Dji n'èle sâreûs catchî !
538. Bènwèt : Dji n'djâse nin dèl'vosse mins dèl cisse di l'ôto
539. Alice : Cisse lale non pu, on n'èle sâreût catchî
540. Bènwèt : Dji m'dis : Vola eune qui n'sét miner èt qu'a volou haper l'ôto da madame Colin... qui vos n'divrîz nin leyî insi so li d'vant sins capote...
541. Julie : Dj'ennè k'nohe onk' qui n'aveût nole ci djoû la non pu !
542. Bènwèt : (*avou compacion*) Mâlèreûs !... Dji m'dis : dji lî va fé s'complumint èt houkî l'police mins qwand dji m'aprépeye, dji veûs qu'èle est so l'sîdje d'a costé dè tchâfeû... Dji trouve ça drole et dji m'dis come ça inte di mi minme...
543. Julie : Al vitèsse qu'i va po raconter, mi-èfant sèrèt-st-è scole qui vos n'sârez nin co l'fin mot d'l'afère !
544. Bènwèt : Bin racontez vos minme insi !
545. Julie : C'est tot simpe... Dji m'porminéve tot chal qwand i m'a pris 'ne doleûr è vinte pwis come ine mâle souweûr èt come i n'aveût nou hame, dji m'a-st-assis è l'ôto qu'esteût droviète la qu'dj'aveûs sogne dè flâwi...
546. Nadine : Çà va mî asteûre ?
547. Julie : Awè èt nèni
548. Nadine : Vos n'alez nin akoukî ?
549. Julie : Oh nèni, ci n'est nin po asteûre...
550. Bènwèt : C'è-st-a sohêtî... Avou l'ôto qu'est so s'frake èt mi qui n'a qu'ine mobylète...
551. Nadine : Wice dimanez-v's ?
552. Julie : Nole pâ !
553. Nadine : Kimint ça nole pâ ?
554. Julie : Dj'esteûs d'vins on hôme po feumes totès seûles mins l'directrice è-st-on cherpîn fini èt îr â matin, dji lî a mètou 'ne pètèye so s'djêve... Ele m'a tapé a l'ouhe...
555. Nadine : Et adon ?

556. Julie : Dj'a roté a l'avîr èt dji m'a r'trové chal al divante...
557. Nadine : N'avez-v's nin faim ?
558. Julie : Nèni, ça va... Dj'aveûs hapé cinq' pistolèts fôrés èt deûs boteyes di coca divant dè kwiter l'djîse...
559. Alice : On n'vis pout rin chervi insi ?
560. Julie : Dji beûreûs mutwè bin on côp di c'boteye la... (*li boteye di likeûr !*)
561. Nadine : Mins ci n'est nin bon po voste èfant...
562. Julie : Ni v'tracassez nin por lu, enn'a veyou des-ôtes !
563. Nadine : C'est come vos volez...Dinez lî on vère Alice..
564. Bènwèt : Dihez mam'zèle, dj'a d'dja oyou dire qu'on bon buveû n'buvève mâye tot seû... adon...
565. Nadine : Dinez 'ne gote a moncheû Bènwèt ossi...

Mins djusse a c'moumint la, vola qui Denise arive a hôteûr di l'ouhe tot breyant...

566. Denise : (*todis fou*) Bènwèt
567. Bènwèt : Bardaf ! Ni m'chervez nin savez, dj'aveûs dit ça po rire...
568. Denise : (*intrans*) Qu'estez-v's co ramanou don ?
569. Bènwèt : C'est pace qu'i m'a falou aminer l'bâcèle chal...
570. Denise : Pokwè ?
571. Bènwèt : Pace qui èle n'est nin bin èt come li docteûr va m'ni chal...
572. Denise : Qui est-ce ?
573. Alice : Nos n'èl savans nin
574. Denise : (*loukant Julie*) C'è-st-ine fougneûse ?
575. Alice : Ine fougneûse ?
576. Denise : Bin awè, on lî a mètou des mayettes !

577. Nadine : Ci n'est nin l'moumint dè rire di leye èdon vwèzène
578. Denise : S'on n'pout pus blaguer savez...
579. Nadine : (*doûcemint a Julie*) Kimint v'lome-t-on ?
580. Julie : Julie
581. Nadine : Vos-avez co vos parints ?
582. Julie : Dj'enn'a màye avou... Mi mame m'a-st-aband'né qwand dj'a m'nou à monde
583. Nadine : Vos n'comptez nin fé pareye avou voste èfant ?
584. Julie : Sés nin co
585. Denise : Di quéel èfant djâse-t-on ?
586. Bènwèt : Li sonk' va... Loukîz-l' come i fât èt vos comprendrez !
587. Denise : Ah ! bin awè... C'est vos' prumîr ?
588. Julie : Awè
589. Alice : C'è-st-on valèt ou 'ne pitite bâcèle ?
590. Julie : Qui sés-dje don mi ? Si v'comptez qu'dj'a les moyins po m'payî ine échographie !
591. Bènwèt : Denise n'a màye fêt ça non pus... Ça todîs stu 'ne surprise !
592. Denise : Surprise, surprise... Li vîle Catrène qui tapéve les cwârdjeûs m'a chake feye dit qui ci sèreût-st-on valet èt èle ni s'a màye trompé...Mâlureûs'mint d'ayeûrs...
593. Bènwèt : Louke, tot d'on côp vola qu'i m'aspite ine îdeye
594. Denise : Lisquéle don ?
595. Bènwèt : Li p'tite la vint dè dire qu'èle ni saveût nin si èle wâdreût si èfant...
596. Denise : Possibe èt adon ?
597. Bènwèt : Si c'è-st-ine bâcèle, nos pôrîz mutwè l'adop'ter
598. Denise : Pokwè heye ?
599. Bènwèt : Come ça, vos-ârîz l'bâcèle qui v's-ârîz todîs bin volou...
600. Denise : Trop târd valèt ! Dji n'ratake pus avou des gnègnês ... c'est trop' d'ovrèdjès

601. Bènwèt : Bin c'est tot l'minme mi qu'les fêt...
602. Denise : Mins dji tûse chal mi... I m'sonle qui vos fez bin dè cas dèl bâcèle èt di si èfant mi ?
603. Bènwèt : Bin nona... Dj'a dit ça insi po v'fé plêzîr
604. Denise : Enn'èstèz-v's sûr ?
605. Bènwèt : Tot a fêt !
606. Denise : C'est tot l'minme drole qui c'est vos qui l'a raminé chal...
607. Bènwèt : C'è-st-on hazard...
608. Denise : Vreye?
609. Bènwèt : Dj'èl djeûre so l'tièsse di m'grand mère qui m'a-st-aclèvé !
610. Denise : Et qu'est mwète dispôye 20 ans ! Àheye hin dè djurer insi !
611. Bènwèt : Mins enfin...
612. Denise : C'est qu'dji v'kinohe parèt ! Come dj'a mètou l'hola après nos' cinkinme èfant, vos sèrîz co bin capâbe d'aller rispâde vosse simince ôt'pâ savez vos !
613. Bènwèt : Po dire des pareyes, vos f'rîz mî di v'tère
614. Denise : Têhîz-v's li prumîr d'abôrd !... Dji vous savu ! (*a Julie*) Qui est-ce li pére di voste èfant ?
615. Julie : Sûr nin lu !
616. Nadine : Vos savez qui c'est ?
617. Julie : Awè mins dji n'sés nin s'nom ni wice qu'i d'mane
618. Nadine : Ine avinteûre kwè ?
619. Julie : Awè, li nut' dè novèl an... Dj'esteûs d'manowe tote seûle à home...po loukî às èfants dès copleuses qu'avît des radjous ou qu'ennè kwèrît
620. Nadine : Nin tote seûle pwisqui...
621. Julie : Bin awè, lu, il esteût m'nou dèpaner li tchâfreye...
622. Alice : (*po leye minme*) Bardaf ! Wadje-tu qu'c'est...
623. Julie : èt dj'a volou goster çou qui féve djèri les feumes qui dj'hâbitève...Dji n'sés si

c'est po m'diner on genre ou kwè mins dj'inme bin dè fé fé pareye qui l'z-ôtes, come po çoula (*èle mosteure ses tatouwèdjés*) et çoula (*èle mosteure ses percing*)

624. Alice : Si dj'comprinds bin, c'est vos qu'a r'cwèrou l'père di vost'èfant
625. Julie : Bin awè... A vreye dire, dji n'a nin d'vou hôler d'trop'... Nos-avans pris çoula tos les deûs po on djeû... on djeû qu'a mâ toûrné parèt...
626. Nadine : Dji veûs qui vos n'estez qu'ine pôve pitite kimére... Alè, on va s'occuper d'vos... Po k'mincî, vos v's-aller on pô leyî ravu èl tchambe di m'feye...
627. Julie : Nèni, ça va-st-aller...
628. Nadine : Dji n'vis vous nin veûye avà les vôyes come vos estez la... vinez, dji v'va t'ni k'pagnéye (*èle l'èmon.ne èt Julie èl sût mâgré leye èl tchambe da Sonia*)

Eles sont-st-a hipe foû qu'on sone a l'ouhe di d'avant

629. Bènwèt : Ah ! c'est sûr li docteur
630. Alice : Bin probâbe (*èle va vès l'colidor*)
631. Bènwèt : Dimanez, dji va-st-aller drovièt
632. Alice : Mins nèni, dj'a 'ne sakwè a lî dire
633. Bènwèt : Vos lî dîrez bin chal... Fât tot l'minme qu'il inteure...
634. Alice : Mins ça n'si fêt nin qui c'seûye in-ètrindjîre...
635. Bènwèt : On s'kinohe dispôye des anneyes, i n'sèrèt nin èwaré... (*on r'sone*) Il est pressé, come d'âbitude (*èt i sôrteye*)

Mins ci n'est nou docteur, c'est Pauline qu'intoure come ine distermineye.

636. Pauline : (*off pwis in*) Wice sont-èles les minteûses qui dj'èlzî deye mi façon d'pinseye !
637. Bènwèt : Douc'mint madame, doûc'mint !
638. Pauline : Ah ! Vola todîs eune
639. Alice : Dji sos 'ne minteûse mi ?
640. Pauline : Assûré ! Po m'ni dîre qui dj'aveûs m'portrèt so l'burô da mi-ome adon qu'i

n'î est nin !

641. Alice : Qu'i n'î est pus volez-v's dire
642. Pauline : Et mi, dj'a les pines qu'i n'î a mâye situ... sya, mutwè dè timps d'nos hantreyes èt èco...
643. Alice : Mi, dji v'dis qu'dji l'a veyou... asteûre s'i n'est pus la, mètans qui dji n'vis âye rin dit
644. Pauline : Et l'ôte, li Nadine, wice è-st-èle ?
645. Alice : El tchambe da s'feye avou 'ne malåde
646. Pauline : Dj'èl vôteûs bin veuye tins mi c'malåde la (*èle va vès l'tchambe*)
647. Bènwèt : Stop ! On n'dèrindje nin les djins come ça !
648. Pauline : Ah ! dji veûs... On saveût bin qui dj'alève rim'ni èt on-z-a pris on tchin d'garde !
649. Denise : Dji v'disfind dè dire qui mi-ome è-st-on tchin !
650. Alice : (*ryant*) Et ci c'enn'esteût onk', ci sèreût pus vite on toutou qu'on dôberman' èdon moncheû Bènèt
651. Bènwèt : Tttt'...
Hoûtez madame, seyîz binameye... Nos estans chal qui nos ratindans l'docteûr...
652. Pauline : Li docteûr ? Tènè, tènè, tènè...
653. Bènwèt : Mins awè
654. Pauline : Et bin dj'èl va rawåde ossi... Et tant qui dji n'èl veûrès nin ariver, qui c'seûye di d'la (*li colidôr*) ou foû d'la (*li tchambe da Sonia*), dji n'bodj'rès pus d'ine simèle !
655. Denise : Vos-estez malåde ?
656. Pauline : Enn'a-dj'dju l'êr ?
657. Bènwèt : Sûr qui nèni !
658. Denise : Adon pokwè volez-v's ratinde li docteûr ?
659. Pauline : Pace qui c'est mi-ome ! Ça îrèt-i come ça ?
660. Bènwèt : (*tot bas à Alice*) C'è-st-ine sote hin, li docteûr est veuf dispôye dih'ans

661. Pauline : Qui d'hez-v's ?
662. Bènwèt : Rin, rin (*èco tot bas*) Dji va-st-aller cwèri li psichiate qui d'mane chal al divante...
663. Alice : Leyîz-l' à réze, c'est bon...

Et vola qui Marco atchoûke si tièsse èl crèveure di li f'gnèsse

664. Marco : C'est mi, pout-on intrer ?
665. Alice : Mousse vî strouk'
666. Marco : Al vole hin gueugueûye.... (*a Bènwèt*) Ah vos-estez la
667. Bènwèt : Awè... èt les clés ossi
668. Marco : (*mostrant Denise*) Et madame c'est ?
669. Bènwèt : Madame
670. Marco : Estchanté dè fé vosse kinohance madame
671. Bènwèt : C'est l'plonkî
672. Denise : Ah ! Mi pareye moncheû
673. Marco : (*veyant apreume Pauline*) Ooh Bondjou savez madame Jadoule
674. Pauline : Bondjou Ma... moncheû...
675. Alice : Vos v'kinohez ?
676. Marco : Assûrémint ! Dj'èl va sovint dépanner... èdon madame ?
677. Pauline : (*djin.neye*)Awè...
678. Alice : Vos estez contin.ne di lu dji wadje ?
679. Pauline : Awè...
680. Marco : Ine sakî sét î fé parèt, èdon madame ?
681. Pauline : Awè...
682. Alice : Djan, c'è-st-in-ome tot -oute, bon po tot !
683. Marco : La, dji n'l'a nin fêt dire èdon...

684. Nadine : (*rim'nant*) Ele dwème... Oh ! V's-estez la parèt Marco ?
685. Marco : Bin awè... C'è-st-on r'proche?
686. Nadine : Nona ciètes ! N'a nou problinme avou Sonia ?
687. Marco : Nôna. Dji sos djusse rim'nou po fé m'papî ... Torade, dji n'as nin pris l'timps di v'dimander kwè qui s'seûye la qu'vos-avîz l'feû à cou po...enfin, vos savez tot ça come mi..
688. Pauline : (*a pârt*) Eh bin ! C'è-st-on fameû lascârd èt leye, ine fameûse pèlète !

Et vola on GSM qui sone... Tot l'monde si r'louke on moumint...

689. Bènwèt : (*à Denise*) C'est l'vosse
690. Denise : Awè dê Mon Dju... Allô ? Pokwè rentrer ? ...Aye, aye... Tinez bon m'gamin, vos'papa va-st-ariver...
691. Bènwèt : Qu'i n'a-t-i don ?
692. Denise : C'est l'tchèt...
693. Bènwèt : Li tchèt qui tèlèfone ?
694. Denise : Nèni, c'est Robert mins i n'a l'tchèt qu'a-st-apici l'rosti qui v's-avîz aprusté po dîner
695. Bènwèt : Et fât qu'dj'î vâye po ça ?
696. Denise : Awè ca il a potchi so l'ârmâ qu'èst-al copète di l'évier...
697. Bènwèt : C'est s'plèce !
698. Denise : Li gamin l'a volou aller r'cwèri...
699. Bènwèt : Li tchèt ?
700. Denise : Nona, li rosti... mins l'ârmâ a m'nou èrî dè meûr, a toumé so l'robinèt qu'a hotchi èt l'êwe sipritche tot avâ l'mohone...
701. Bènwèt : Dji n'sos nin plonkî mi !
702. Marco : Mi bin, mostrez-m' li vòye
703. Bènwèt : Mi ?

704. Marco : Bin awè !
705. Bènwèt : Bon insi... Qu'a torade don mes djins (I *sôrteye* *souvou di Marco*)
706. Denise : Fârèt bin î aller ossi ca Bènwèt n'sét rin fé tot seû... (*èle sôrteye*)
707. Alice : C'est d'dja l'èquipe hin ces deûs la !
708. Nadine : A quî l'dihez-v's !
709. Alice : Dihez madame, dj'a-st-îdeye d'ine bone jate di cafè mi
710. Nadine : Dji beûreûs voltî eune ossi
711. Alice : (*mostrant Pauline*) Dji fês eune po madame ossi ?
712. Nadine : Dimandez-lî
713. Pauline : Nèni merci. Dj'âreûs bel êr èdon dè beûre on cafè è vosse kipagneye ! Ci sèrèût on pô fwêrt nèni ?
714. Alice : On pô fwêrt di cafè ! (*èle reye*)
715. Nadine : Â pont qu'vos 'nn'estez savez... Vos estez dèdja instaleye come è vosse mohone
716. Pauline : Ça v'djin.ne ?
717. Nadine : Brâmint ! Dji m'dimande d'ayeûrs pokwè dji n'vis mète nin a l'ouhe
718. Pauline : (*bin stampeye*) Vos polez todîs sayî !
719. Nadine : Dji pôreûs houkî l'police...
720. Pauline : Nou probleinne ! Si dj'deûs sôrti, dji m'assîs so l'sou èt dj'fês vos' portrèt a tot l'cwârtî
721. Nadine : On n'a rin a m'riprocher ...
722. Pauline : Ni fez nin l'sinte Nitouche alez, ça n'vis va nin !
723. Nadine : Dismètant qu'vos, ça v'va fwêrt bin dè prinde des grands-êrs !
724. Alice : Leyîz-l' à réze madame... Vinez beûre ine jate èl couhène avou mi...
725. Nadine : Dji creûs qu'ça vâret mî... (*èles sôrtèt totes les deûs*)
726. Pauline : Si èle si compte pus fwète èt pus malène qui mi, èle a 'ne bèle pê so s'nez !

A c'moumint la, vola ine feume (Estelle) qu'intoure po l'pwète fignèsse. Ele è-st-ossi eksiteye qu'èwareye

727. Estelle : Prém'nez l'docteur qui dj'sos la s'i v'plêt ! (*èt èle si va couûkî è canapé*)
728. Pauline : Li docteur ? Qué docteur don ?
729. Estelle : N'a nin trinte-sîh' mi sonle-t-i !
730. Pauline : Nèni mins a m'sonlon, i n'a nou docteur chal
731. Estelle : Bin sya, i m'ratind !
732. Pauline : Chal ?
733. Estelle : Wice sèreûs-s' ? D'ayeûrs, c'est todis chal qui dj'vins
734. Pauline : Pokwè fé ?
735. Estelle : I n'a qu'lu qu'est capâbe di m'rinde di l'èhowe
736. Pauline : Et i v'mète radjou chal ?
737. Estelle : Bin awè
738. Pauline : Minme li dîmègne ?
739. Estelle : Por mi, il est tofêr libe...
740. Pauline : Et i v'rinde di l'èhowe, la, so l'canapé ?
741. Estelle : Bin awè...I dit qu'i vât mî qui dji seûye couûkeye
742. Pauline : Vos n'vis lom'rîz nin Nadine par hazard ?
743. Estelle : Nadine ? Pokwè nin ?
744. Pauline : Pokwè nin ?? ? Nadine ou nin Nadine ?
745. Estelle : Evôye po Nadine ... N'est-ce nin on bê nom ?
746. Pauline : Insi, c'est vos ! Bin va, dji n'm'âreûs mâye doté... Et l'ôte leye la qui fêt mohone di passe è s'prôpe djîse !
747. Estelle : Et kwè, houkîz-v's li docteur ou n'èl houkîz-v's nin ?
748. Pauline : I va-st-ariver
749. Estelle : Ah ! il a d'vou sôrti... Portant d'âbitude, il est todis la qwand dj'arive... Enfin, dji ratindrès... minme si dj'ennè pous pus (*èt èle fêt on gros sospîr*,

sère les oûys èt fêt des p'tits mouv'mints nierveûs)

Alice rinteûre avou s' jate di cafè

750. Alice : Vos m'richal... Li tims ni v's-a nin parètou trop long tote seûle ?
751. Pauline : Dji n'esteûs nin tote seûle, dj'a-st-avou li k'pagneye da Nadine.
752. Alice : Da Nadine ??? Ratindez 'ne munute ! (*èle va vès l'coughène èt rivint ossi vite*)
Dji comptève qui dji dim'nève sote mins c'est vos qui l'est : Nadine èst todis èl coughène !
753. Pauline : (*mostrant l'canapé*)Ele est la ossi
754. Alice : (*alant veûye*) Qu'est-ce qui c'est co qu'ça ?
755. Pauline : C'est Nadine... Vos polez dire a vosse dame qu'èle est m'nowe !
756. Alice : Madame ni ratind nole Nadine
757. Pauline : Qui vos d'hez ! Et pwis, vos n'estez mutwè nin à coran dè p'tit commerce qu'i s'passe chal
758. Alice : Qué commerce don ?
759. Pauline : Vosse dame èmantche des radjous èt mi-ome è-st-eune di ses candes ! Et c'est da c'Nadine la (*mostrant l'canapé*) qu'il est li p'tit tchou
760. Alice : Ah bon...
761. Estelle : (*rim'nant so l'tère*) Et kwè, èt l'docteûr, vint-i ou n'vint-i nin ?
762. Pauline : Leyîz-m' vis dire qui minme s'i vint, i n'vis touch'rèt nin !
763. Estelle : Et pokwè don ?
764. Pauline : Pokwè ?... Pokwè ? ... Pace qui... Et pwis vos l'sârez todis timpe assez ! (*èt gnerveûse, èle prind ine cigarète*)
765. Alice : Mande escusse, mins chal, c'est come divins les cafès, si on vout foumî, i fât-staler so l'tèrassè
766. Pauline : Bin ça n'mi frèt nin dè twêrt dè haper l'êr ca l'êrèdje di d'chal atake a m'rinde malâde (*èt èle sôrteye*)
767. Estelle : Qué droles di contes qu'èle a èdon po ine assistante... Wice è-st-èle èvôye asteûre ?

768. Alice : Cwèri l'docteur ! (*èt èle riva èl couhène dismètant qui Marco rarive*)
769. Marco : (*rintrant*) Vo m'richal!
770. Estelle : Ah ! Tot l'minme ! Dj'atakéve a-z-avu l'timps long savez docteur (*èle si lève po li d'ner l'main*)
771. Marco : Docteur ?
772. Estelle : C'est drole, vos m'parètez pu p'tit (ou pu grand) qu'd'âbitude
773. Marco : C'est normâl pwisqui dji n'sos nin l'docteur
774. Estelle : Blagueur va ! (*alant si r'koukî*) Alè, atakans, dji sos prête !
775. Marco : Prête à... ?
776. Estelle : Come di djusse ! Come d'âbitude enfin...
777. Marco : Nin chal tot l'minme ! ?
778. Estelle : Et pokwè nin ?
779. Marco : I pôreût amoussi 'ne sakî...
780. Estelle : Pinsez-v's ?
781. Marco : Bin awè
782. Estelle : Wice alans-n's fé ça d'abôrd ?
783. Marco : Ratindez... (*i va awêti a l'ouhe dèl tchambe da Nadine pwis...*) Chal ! ça frèt bin l'afère... Vinez !
784. Estelle : (*moussant èl tchambe*) Aah ! Dji m'va poleûr tot l'minme soulager... (*èt Marco èl sût*)
785. Nadine : (*intransant sùvowe d'Alice*) Qui m'racontez-v's la don, i n'a persone chal
786. Alice : Portant, n'a cinq' munutes...
787. Estelle : (*off*) Mins qui v'prind-t-i vos tot d'on côp ? À secours... À secours.. (*èle adâre fou dèl tchambe èt sère li pwète al clé*) Ah ! êdîz-m' vos-ôtes !... Fât tèlefoner al police, èt a mi-ome ossi, tot dreût !
788. Nadine : Qui s'passe-t-i ?
789. Estelle : I n'a l'docteur qu'est dim'nou sot
790. Nadine : Qué docteur ?

791. Estelle : Bin, mi docteur sûrmint !
792. Nadine : Wice-è-st-i ?
793. Estelle : Bin la...
794. Nadine : Et qui fêt-i ?
795. Estelle : Bin po l'moumint, i deut-esse en train dè r'mète si pantalon...
796. Nadine : Si pantalon ?
797. Estelle : Portant, i n'a mâye fêt ça... mins ouy', dj'esteûs a hipe koukeye qu'i s'a dismoussi ... Dj'ennè r'vins nin... Lu qu'est tofèr si atincioné... Por mi, c'est l'lét qui li a fêt piède li tièsse... Pace qui veyez-v's, d'âbitude, on fêt ça so l'canapé
798. Nadine : So c'canapé chal ?
799. Estelle : Nèni, so l'ôte, li vî enfin... Ci-chal, c'è-st-on novê...
800. Alice : Comprind pus rin savez mi madame
801. Nadine : On va-st-aller veuye quî qu'est la
802. Estelle : Pwisqui dji v'dis qu'c'est l'docteur !
803. Nadine : Dj'enn'ârès l'coûr nèt' (*èle va vès l'tchambe mins l'ouhe èst sèreye*)
804. Estelle : N'a nole avance, c'est mi qu'a l'clé... èt dji n'èl donrès qu'al police ! Avez-v's tèlefoné ?
805. Alice : Dji vins dèl fé...

A c'moumint la, vola Denise qui s'amon.ne. Ele a mètou on djène ciré

806. Denise : Fât-st-assoti quéle afère ! I n'a d'l'êwe tot avà l'mohone.
807. Estelle : Ah ! vos-estez la... Merci d'avu fêt vite savez... (*mostrant l'tchambe*) Il est la...
808. Denise : Qui don ?
809. Estelle : Li docteur...
810. Denise : Qui fêt-i la ?

811. Estelle : Alez veûye vola l'clé...
812. Nadine : *(hapant l'clé)* C'est mi qui va veûye ! *(èt èle tape l'ouhe à lådje. Marco aparète tot djin.né)* Ha Ha ha ! C'est ça vos' docteur ?
813. Estelle : Bin awè
814. Nadine : Mins i n'est nin docteur
815. Marco : Dji lî aveûs dit !

Et vola Bènwèt qu'arive a s'tour

816. Bènwèt : Qué novèle don Denise ?
817. Estelle : *(dârant so Bènwèt)* Oh vos-estez la mamour, fât nin m'ennè voleûr savez...
Dji n'î sos po rin
818. Bènwèt : Dji m'ennè dote
819. Denise : N'a-t-èle nin dit mamour don cisse lalè ?
820. Bènwèt : N'a nin ètindou ça savez mi...
821. Denise : Mi bin parèt ! *(a Estelle)* Pokwè avez-v's dit mamour a ciste ome la vos ?
822. Estelle : Bin pace qui c'est mi-ome
823. Denise : Vos' galand volez-v's dire pace qui s'feume, c'est mi !
824. Estelle : Vos dim'nez sote vos ! I n'a trinte ans qui dj'sos mariyeye avou Victôr
825. Alice : Ci n'est nin Victôr, c'est Bènèt ! *(sospîr da Bènwèt)*
826. Denise : Awè, èt c'est da meune èt dj'èl wåde ! *(èle ahètche Bènwèt djondant d'leye)*
827. Estelle : *(volant rapicî Bènwèt)* Vinez d'lé mi Victôr èt dihez lî l'vreye
828. Denise : *(hâssihant so Estelle)* Hètchîz-v's èvôye ou dji v'fês 'ne tièsse come ine savôye !
829. Estelle : Kwè ? C'est mi l'victime èt c'est sor mi qui l'police vout bouhî ?
830. Denise : Po k'mincî, sèpez qui dji n'sos nin dèl police èt...
831. Estelle : Mins c'est co pé...Adon, vos-estez 'ne complice... À secours, À secours *(èt èle dâre foû à moumint qui Pauline rinteûre. Come di djusse, èles moussèt eune divins l'ôte èt basculèt)*

832. Bènwèt : Bardaf ! (*i vout aller vès les feumes*)
833. Denise : Dimanez chal vos !
834. Bènwèt : Mins èles ni bodjèt pus !
835. Denise : M'en fout !
836. Bènwèt : Fât tot l'minme qu'on fêsse ine sakwè
837. Alice : (*ryant*)Vas-î twè Marco pwisqui t'es docteur
838. Marco : C'est d'dja bon hin (*il î va tot l'minme*)
839. Julie : (*aparètant*) Qu'i n'a-t-i po on disdu don chal ?

Tot l'monde sâf les deûs feumes si r'toùne so Julie. Ci-chal rik'nohe Marco, èle li mosteure dè deugt tot volant dire ine sakwè mins èle tome flåwe

840. Alice : Bardaf !!!

Ridô

Treuzinme ake

On ètind ine ambulance qu'ennè va. Julie è-st-è canapé dismètant qui Nadine louke èvès l'åd'foû...

841. Nadine : (*rintrant èl plèce*) Bone dihèdje ! (*a Julie*) Et vos kimint v'va-t-i ?
842. Julie : Ça va.... Sins pus'
843. Nadine : Vos n'savez todis nin çou qu'i v's-a-starivé ?
844. Julie : Nôna...
845. Nadine : Vos n'èl savez nin ou vos n'èl volez nin dire ?
846. Julie : Tûsez çou qu'vos volez...
847. Nadine : Ah nèni èdon bâcèle ! Si c'est po m'fé des catchotreyes, i n'a nole rêzon qui dji v'wåde co chal.
848. Julie : (*si lèvant*) C'est bon, dj'ennè va !
849. Nadine : Ci n'est nin l'moumint dè fé l'ènocin.ne ! Assiez-v's !
850. Julie : Savez-v's bin çou qu'vos volez vos al fin dè conte !?
851. Nadine : Vis-êdî mins po çoula, i fâreût qu'vos mètahîz on pô dèl bone vol'té...
852. Julie : Qui volez-v's qui dji v'deye ?
853. Nadine : Çou qui v's-a pris torade !... (*nole response*) C'est si malâheye qui çoula a dire ?
854. Julie : Les...les djins qu'estît chal torade, wice sont-i ?
855. Nadine : I rahouplèt l'êwe amons les vwèzins
856. Julie : C'est vos vwèzins turtos ?
857. Nadine : Nona... Alice, c'est m'feume d'ovrèdje èt pwis i n'a on plonkî qui m'aveût m'nou dispaner...
858. Julie : C'è-st-eune di vos k'nohances ?
859. Nadine : Djusse ine kinohance da Alice... Mi, dji n'l'aveûs mâye veyou.
860. Julie : Alice èt lu sont galand et crapôde ?

861. Nadine : Dji n'pinse nin
862. Julie : Vos n'pinsez nin ou vos 'nn'estez sûre ?
863. Nadine : È-st-on mâye sûr di rin?
864. Julie : Bin awè...
865. Nadine : Pokwè d'mandez-v's ça ?
866. Julie : Bin... Po rin !
867. Nadine : Vola qui vos m'mintihez co...
868. Julie : Si pô...
869. Nadine : Si vos l'volez vrinmint savu, dji houke Alice èt on lî d'mande
870. Julie : Èt èle vis dirèt l'vreye ?
871. Nadine : Dji lî frès dire... Èt kwè, dj'èl houke ou dji n'èl houke nin ?
872. Julie : Come vos volez...
873. Nadine : Bon ! Ça, ça vout dire awè. (*èle prind s'tèlèfone*) Alice ? Rim'nez-on pô 'ne munute alez... S'i n'a moyin awè... Ça va... (*a Julie*) Èle arive...
874. Julie : Vola qui d' sos djin.neye asteûre
875. Nadine : Djinn.neye pokwè ?
876. Julie : Di lî fé dire kwè ou come divant mi
877. Nadine : Bèle afère !
878. Julie : Tot l'minme... Dji n'pôreûs nin raler èl tchambe di vosse feye sol timps qui vos l'kestionez ?
879. Nadine : Alez-î parèt...
880. Julie : Dj'inme mî... Merci madame (*èt èle mousse èl tchambe*)
881. Nadine : Èle catche ine sakwè, ci n'est nin possible ôt'mint !
882. Alice : (*rintrant*) Vo m'la !
883. Nadine : Ça va a costé ?
884. Alice : On est bin avnci... Mins dj'a les pinse qui c'n'est nin po m'dimander çoula qui v'm'avez d'mandé dè m'ni

885. Nadine : Bin nôna...
886. Alice : Qui s'passe-t-i ?
887. Nadine : Dji n'sés kimint v'dimander çoula... Marco, qu'è-st-i à djusse por vos?
888. Alice : On bon camaråde. Pokwè?
889. Nadine : I n'est rin d'pus' qu'on camaråde?
890. Alice : Vôrîz-v's bin? Dji n'sos nin dè janre a chervi d'djodjowe!...
891. Nadine : Dji v'comprinds
892. Alice : Mins pokwè volez-v's savu ça?
893. Nadine : Ci n'est nin mi... C'est li p'tite Julie...
894. Alice : Dji l'âreûs wadji !
895. Nadine : Wadji kwè ?
896. Alice : Qui c'est Marco qui lî a fêt si-êfant
897. Nadine : Qu'est-ce qui v'fêt dire ça ?
898. Alice : Som'nez-v's ! Torade, èle a dit qu'èle aveût r'kwèrou l'ome qu'esteût m'nou dépanner l'tchâfreye... Èt si èle a flâwi torade, c'est pace qui èle l'a rik'nohou.
899. Nadine : Portant lu, i n'a nin bronché...
900. Alice : S'ennè sovint-i seûl'mint ? Ennè r'toûne têt'mint tant !
901. Nadine : Vreye ?
902. Alice : Et d'après çou qu'i m'a dit torade, c'est co pé qui dji n'mâdjinéve
903. Nadine : Bin va... Èt qui pout-on fé ?
904. Alice : Mi, dji n'fês rin. Dji n'mi mèle nin d'ça !
905. Nadine : Dji m'lî va todis dire qu'i n'a rin inte vos èt lu... On veûrèt bin çou qu'èl va dire... (*èt èle mousse èl tchambe*)
906. Alice : Bin vo les la gâye tos les deûs ! (*Mins vola in-ome-Victôr- qui bouhe a li f'gnèsse*) Qu'est-ce qui c'est co qu'ça ? Intrez !
907. Victôr : Escusez-m' di v'dèrindjî mins dji cwîre mi feume...

908. Alice : Vosse feume ? Ça m'èwarreût qu'èle sèrèût chal ! Kwè qu'èle a mutwè m'nou torade...
909. Victôr : Nèni, dji n'èl vous nin bate... Èle ennè pout rin èdon...
910. Alice : Si vos l'dihez...
911. Victôr : Kimint ça qu'vos l'ad'vinez ? On n'si k'nohe nin pinse-dju ?
912. Alice : Dji n'a nin cist'oneûr
913. Victôr : On mâleûr, vos l'avez dit ! Mâdjinez-v's qu'i n'a deûs-ans, nos avan-st-avou in-accidint d'auto èt m'feume a stu aksûde à cervê...
914. Alice : (*riyant mâgré leye*) Èt vos d'vins les oreyes...
915. Victôr : C'est l'veye, come vos l'dihez... Atincion, èle a des bons moumints mins èle fêt des crises... qu'èle sint m'ni d'abôrd...
916. Alice : Oho !
917. Victôr : Adon èle prind tot dreût radjou avou li psy qui d'mane chal al divante... Qwand dj'a rimnou d'messe, èle m'aveût leyî on papî po dire qu'èle l'alève trover mins èle n'î a mâye situ... Li crise s'ârèt déclaré èt èle s'ârèt pierdou... ça fêt qui dji fês tot l'cwârtî po l'ritrover
918. Alice : Dji creûs bin savu qui c'est ...
919. Victôr : Qui qu'c'est ? On l'lome Estelle
920. Alice : Estelle ? Adon nèni, ci n'est nin leye
921. Victôr : Sya, c'est Estelle
922. Alice : Dji vous bin mins li feume qui dj'a veyou et qui m'paratéve on pô dèrindjeye si l'ouméve Nadine...
923. Victôr : Qui d'hez-v's ? Djâsez pus fwêrt ca dji so-st-on pô soûrdô
924. Alice : On pô? Tchance èt tot!
925. Victôr : Quî qu'est sot?
926. Alice : (*breyant*) Persone!
927. Victôr : Pokwè breyez-v's come ça don?
928. Alice : (*articulant*) Dji n'brês nin. Dji v's-eksplique qu'il a m'nou 'ne feume chal qui voléve veuye on docteur mins on l'louméve Nadine

929. Victôr : C'est leye ! Qwand l'crise li prind, èle roûveye disqu'a s'nom
930. Alice : Ah bon !
931. Victôr : Èt wice è-st-èle ?
932. Alice : Wice è-st-èle Estelle? Bone question! (*articulant*) A l'ospitâ mins dji n'sés wice...
933. Victôr : A l'ospitâ? Qu'a-t-èle?
934. Alice : (*articulant èt fant des djesses*) Èle a toumé so s'tièsse
935. Victôr : Èco 'ne feye ? Èt a quéel ospitâ è-st-èle ?
936. Alice : Sés rin hin mi...
937. Victôr : Nèni nin Hinri. Mi, c'est Victôr
938. Alice : (*articulant èt fant des djesses*) Assiez-v's on moumint, mi, dji m'va rak'sègnî. (*èt dimètant qu'i s'assîd, Alice va tèlèfoner*) Marco ? Awè, c'est mi... Dis, sés's' bin wice qui l'ambulance a miné les feumes ? ... Á bon secours... merci.
939. Victôr : Pokwè « à secours »
940. Alice : (*articulant*) L'ospitâ, c'est l'bon secours
941. Victôr : « Á bon secours », c'est d'dja long ça. Kimint vas-dje î aller mi ? Dji so-st-a vélo...

A c'moumint la, Marco rarive avou Bènwèt

942. Marco : Vos nos r'la...Dj'esteûs chal al divande qwand t'as tèlèfoné...
943. Alice : V's-avez fini ?
944. Marco : Awè... N'a pu qu'a r'nèti mins ça n'mi compète pu...
945. Bènwèt : C'est djusse on pô pus d'ovrèdje por mi
946. Alice : Mins vos fez 'ne pitite ahote !
947. Bènwèt : C'è-st-a dire...
948. Marco : I parèt qu'chal, i n'a 'ne bone gote po s'rihaper d'ses sognes

949. Bènwèt : Minme qui Denise a dit qui dj'poléve beûre eune ossi
950. Alice : Grande novèle !
951. Marco : Èt kwè ? Nos chève tu insi ?
952. Alice : Dji v'va chervi mins après, fâret rinde chervice a l'ome chal
953. Marco : Qui est-ce ?
954. Alice : L'ome dèl feume qui t'as volou... choser èl tchambe
955. Marco : Tês-s' tu hin twè !
956. Alice : Tracasse nin, I n'ôd pu.
957. Bènwèt : C'est Victôr ?
958. Victôr : Qu'i n'a-ti ?
959. Alice : Rin
960. Marco : Èt qui pout-on por lu ?
961. Alice : Fâreût l'miner « à bon secours »
962. Marco : Bin dj'n'aresteyerès pu dè fé l'taxi mi !
963. Alice : C'est po fé 'ne bone oûve hin... Alè, vinez èl couhène, dji v'va chervi... (*a Victôr, articulant èt fant des djesses*) Vinez beûre on vère avou les-ôtes...
964. Victôr : Awè ? Merci savez... (*i sôrtèt tos les cwate mins Marco raparète ossi vite po m'ni cwèri l'boteye*)
965. Marco : (*distant è colidôr*) Ça va, dji sés bin wice qu'èle est !
966. Nadine : (*rintrant*) Ah Marco... Dji sos binâhe di v'veûye
967. Marco : (*tot souk'*) Oho ?
968. Nadine : Awè c'est d'dja bon don vos !
969. Marco : Mande eskusse...
970. Nadine : Ine prumîre kèsse d'abôrd ! S'a-t-i dèdja passé ine sakwè inte vos èt Alice ?
971. Marco : Avou Alice ? Sûr qui nèni ! D'abôrd, fâreût dèdja èsse fwêrt, èle a-st-ine vertu come on vantrin d'cwèpî !

972. Nadine : Vos m'frîz co bin rire
973. Marco : Riyez èdon, li mowe est ça pu bèle
974. Nadine : Mutwè mins dji n'sos nin sûre qui c'est l'bon moumint
975. Marco : D'òu vint ?
976. Nadine : I n'a 'ne bâcèle la èl tchambe qui v'vôreût bin djâser
977. Marco : Dji m'disméfeye des feumes divins vos tchambes savez mi... Ine astrapåde par djoû, c'è-st-assez...
978. Nadine : Vos n'corez nou risse di c'costé la... Vos polez î aller.
979. Marco : Vos pinsez vrinmint ?
980. Nadine : Minme qui dji v's-èl dimande...
981. Marco : C'est qu'dj'aléve pwèrter l'boteye...
982. Nadine : Dinez m'èl, dji m'enn'ocupeye...
983. Marco : Come vos volez... (*i va vès l'tchambe, si r'toûne so Nadine qui li fêt sène de moussî... il î va*)
984. Bènwèt : (*è colidôr*) Èt kwè plonkî, ès-s' la po ponre ou po cover ? (*i veut Nadine*) Oh ! Pardon savez madame
985. Nadine : Ci n'est rin... Tinez èt buvez a m'santé... Dj'enn'a bin mèzâhe...(*Bènwèt 'nnè va èt Nadine s'assîd nanteye*) Ah Simon... si on v'dihéve çou qu'vos' pitit tchèt vike po l'moumint, vos n'èl creûrîz nin...

Èt li sin.ne passe à neûr...

Qwand on ralome, Nadine est todis èl minme plèce qu'èle tûse. Marco vint foû dèl tchambe...

986. Marco : Vola, dji m'a ekspliqué avou leye...
987. Nadine : Èt kwè ?
988. Marco : Èt kwè ? Èt kwè ? Dji n'sés nin wice qui dj'ennè sos èt çou qu'dji deûs fé...
989. Nadine : Vos n'frîz nin vos' divwêr ?
990. Marco : Divwêr, divwêr... âheye a dire ça

991. Nadine : Tot l'minme...
992. Marco : Po v'dire li vreye, dji n'mi veûs nin bin èl pê d'in-ome marié èt co mons èl cisse d'on père di famille...
993. Nadine : Trop' di responsâbilités ?
994. Marco : Pu vite trop pô d'liberté !
995. Nadine : Ça...
996. Marco : C'est qu'dj'a des bonès pratiques parèt...
997. Nadine : Nin des p'tits poyons come Julie dji wadje
998. Marco : C'est vreye qu'èle a tot çou qu'i fât wice qui fât
999. Nadine : Vos veyez bin
1000. Marco : Di totes manîres, dj'a co l'timps dè rèflèchi... L'èfant nin nin co la.
1001. Nadine : Èt tot ratindant, wice va-t-èle aller ? Qui va-t-èle dim'ni ?
1002. Marco : Sés rin mi...
1003. Nadine : Admètez tot l'minme qui v's-estez 'ne miète responsâbe...
1004. Marco : Vos n'avez nin plèce po l'wârdè vos ?
1005. Nadine : Bin nôna... Dji n'a qu'deûs tchambes èt...
1006. Marco : Dji tûse chal mi, Alice est tote seûle leye...
1007. Nadine : Vos èmantchîz les afêres come des cèlihes so on baston savez vos...
1008. Marco : Ci sèreût tot simpe nèni ?
1009. Nadine : Tot simpe, tot simpe, c'est vite dit...
1010. Marco : Dji m'va rèflèchi a l'situâsion tot minant l'ome disqu'a l'ospitâ
1011. Nadine : Quél ome don ?
1012. Marco : L'ome dèl sote qu'a m'nou torade èt qu'a strouki avou Pauline
1013. Nadine : Pauline ?
1014. Marco : Madame Jadoule èdon
1015. Nadine : Vos l'loumez Pauline ?

1016. Marco : Bin c'è-st-a dire...
1017. Nadine : Deûs-dje comprinde qui c'è-st-eune di vos bonès pratiques ?
1018. Marco : Chal madame, « la discrétion est de rigueur »
1019. Nadine : Mande escusse...
1020. Marco : On n'djâse pus d'ça... Bon, mins d'vant ça, dji m'va beûre mi gote divant qu'vos'vwèzin n'aye bu tote li boteye avou l'ome en question
1021. Nadine : Cist-ome la est chal ?
1022. Marco : Bin awè... èl couhène
1023. Nadine : Qwand dji tûse qu'i n'divève vini persone...
1024. Marco : A pàrt li docteur enfin...
1025. Nadine : Tot djusse !
1026. Marco : Alè, a tot dreût (*èt i sôrteye*)

Ossi vite, Julie vint foû dèl tchambe...

1027. Nadine : Èt kwè, vos lî avez djâsé ?
1028. Julie : Vos l'savez bin èt vos k'nohez ses îdeyes
1029. Nadine : Bin...
1030. Julie : Ni fez nin l'ènocin.ne, dji hoûtéve vosse divise podrî l'ouhe...
1031. Nadine : Ah bon !
1032. Julie : Dji creûs qui dj'n'a rin a espèrer d'lu...
1033. Nadine : Sèreûs-s' mî s'i v'prindéve avou lu sins v's-inmez ?
1034. Julie : Dji n'dis nin mins...
1035. Nadine : Èl veyez-v's voltî vos ?
1036. Julie : C'est malin ça ! Dji n'èl sâreûs veûye voltî pwisqui dji n'èl kinohe nin !
1037. Nadine : C'est co vreye...
1038. Julie : Tot çou qu'dji pous dire, c'est qu'i m'rivint bin...

1039. Nadine : C'est d'dj'a 'ne sakwè
1040. Julie : Mins nin assez assurémint
1041. Nadine : Vos d'vrîz mutwè continuwer a v'hâbiter ?
1042. Julie : D'akwêrd mins l'pé, c'est qu'dji n'sés wice aller...
1043. Nadine : C'est l'hic...
1044. Julie : Dj'a ètindou qu'on djâséve d'amons Alice...
1045. Nadine : Ça, fâreût veûye avou leye...
1046. Alice : (*arivant reûd a bale*) Madame, dji vins d'aveûr ine îdeye mi po Julie ?
1047. Julie : (*tote contin.ne*) C'est vreye ?
1048. Alice : Ah ! V's-estez la ?
1049. Julie : Èt c'est kwè voste îdeye ?
1050. Alice : Ni v's-èbalez nin todis trop vite pace qui fât qu'madame seûye d'akwêrd
1051. Nadine : Ah ! Pace qui ça m'compète ?
1052. Alice : Bin awè. Dj'a sondji qui li timps qu'on lî trouêve on lodjis', djuste l'afêre di kékes djous, èle pôreût fwêrt bin d'mani chal...
1053. Nadine : Èt wice lodj'reût-èle?
1054. Alice : Bin, èl tchambe da Sonia
1055. Nadine : Èt Sonia leye ?
1056. Alice : Bin avou vos la qu'moncheû è-st-èvôye po sakwants djous...
1057. Nadine : M'enfin Alice... (*èle va djondant d'leye po lî djâser a pârt*) Vos savez tot l'minme bin qui dj'âreûs bin volou esse trankile ouy' !
1058. Alice : Eco todis ?
1059. Nadine : Bin awè pwisqui l'feume da Simon è-st-a l'ospità...
1060. Alice : Eh bin vos, i v'fât tot plin po v'rifreûdi !
1061. Julie : Èt kwè ? Est-ce qui les bassès mèsses sont câsi fou ?
1062. Nadine : Nos-avans tot l'minme bin l'dreût di nos ekspliquer m'sonle-ti !

1063. Julie : C'est pace qui dj'a hâse dè savu...
1064. Nadine : Bin vola... Chal, ci n'sèrèt nin possibe mins dj'a-st-ine ôte îdeye !
1065. Alice : I m'sonle qui dj'sins l'ognon !
1066. Nadine : Awè, mins mutwè nin tot a fêt l'cis qu'vos pinsez
1067. Alice : Oho?
1068. Nadine : Vola: Dji v'done condji tote li samin.ne qu'i vint... des condjis payis naturél'mint èt âd'dizeûr dè martchi, dji v'pâye li pinsion da Julie si vos l'prindez è vos' djîse.
1069. Alice : Come kwè qu'l'amour est pus fwêrt qui les çanses hin ?
1070. Nadine : On s'pass'rèt tot l'minme bin d'vos-atotes !
1071. Alice : Mande escusse! Mins si dj'comprinds bin, i n'mi d'mane wêre di tims po reflèchi...
1072. Nadine : Vos comprindez bin !
1073. Alice : Èt si c'est awè, i fâret qu'on bague â pus abeye
1074. Nadine : Vola !
1075. Alice : (*tûsant ou pus vite fant l'èkwance dè tûser*) Aha !
1076. Nadine : Dji v'dimandreûs djusse dè r'fé l'lét da Sonia divant d'enn'aller...
1077. Alice : (*alant brêre è colidôr*) Vinez on pô les omes...
1078. Nadine : Èt vosse response ?
1079. Alice : C'est d'akwêrd èdon
1080. Nadine : A la bone eûre... Dji v'rivâres çoula savez...
1081. Alice : Bin va, dji n'âres mâye situ si bin payeye !
1082. Julie : Èt mi si bin aconteye !

Les 3 omes arivèt. Bènwèt est « hiné »

1083. Marco : Vo nos la ! Qui s'passe-t-i ?

1084. Alice : Kibin pout-on mète di djins è t'camionète ?
1085. Marco : Treûs ! Pokwè ?
1086. Alice : C'è-st-assez !
1087. Marco : Dji sés bin qu'dji deûs miner l'ome a l'ospitâ èt pwis ?
1088. Alice : Nin èt pwis ! Á minme timps! Tot passant, i fâreût d'hèrdjî Julie è m'mohone
1089. Victôr : Nin è m'mohone, a l'ospitâ !
1090. Bènwèt: I m'fèt rire hin mi cila... A costé d'lu, on pôreût dire qui Tournesol ôd clér !
1091. Alice : (*articulant èt mostrant*) Vos, a l'ospitâ, Julie, è m'mohone !
1092. Victôr : Ah !
1093. Bènwèt: Compris Victôr ?
1094. Marco : (A Alice) T'as candji d'îdeye ?
1095. Alice : I n'a qu'les sots qu'n'èl fèt mâye!
1096. Marco : Èt I n'a 'ne sakî è t'mohne?
1097. Alice : (*li d'nant s'clé*) Dji t'vas sûre a vélo mins vola todîs l'clé
1098. Marco : En route insi ! Vinez insi Mam'zèle...Julie

Julie, qui rote malâheyemint, Victôr èt Marco vont vès l'sôrteye. Bènwèt riva vès l'colidôr

1099. Alice : Wice alez-v's vos ?
1100. Bènwèt: Bin... fini m'vère
1101. Alice : Rin du tout ! D'abôrd, li boteye est vûde èt Denise vis ratind... Alè tot l'monde foû d'chal
1102. Bènwèt: Bon, bon... Totes les minmes ces feumes la, totes les minmes...
1103. Julie : Á r'veye madame... èt merci co cint côps...
1104. Nadine: Bone tchance ...
1105. Alice : (*Qwand les 4 sont sôrtous*) Contin.ne ?

1106. Nadine: Bin awè... èt nèni... Dji...
1107. Alice : Ça va aller èdon... Simon v'va fé roûvî tos vos displis... La d'sus, dji m'va vite rifer l'lét. (*èt èle sôrteye èl tchambe da Sonia dismètant qui Nadine s'assîd, tûse, soreye...*)
1108. Nadine: Tote seûle enfin...
1109. Bènwèt : (*rintrant*) Catastrophe ! Catastrophe !
1110. Nadine: Qui s'passe-t-i don ?
1111. Bènwèt : Li p'tite vint dè piède ses êwes...
1112. Nadine: Bin qu'on l'mon.ne d'on côp a l'ospitâ
1113. Bènwèt : Impossibe... Èle est ployeye è deûs èt èle brêt d'mâ... On n'èl pout tcherdji è l'camionète...
1114. Nadine: Dji va houkî ine ambulance
1115. Bènwèt : Èle ariv'rèt trop târd... Victôr dit qu'èle va-st-akoukî !
1116. Nadine: Qui sés-t-i don lu ?
1117. Bènwèt : Il è-st-infirmier èt ci n'est nin pace qu'il est soûrdô qu'i n'sét nin çou qu'i dit !
1118. Nadine: Dji va todis tèlèfoner... Vola qu'dji n'sés pus çou qu'dj'a fêt di m'GSM (*èle nah'teye*) Èl plèce d'esse pé, c'est co pé ! (*èt èle va è s'tchambe*)

A c'moumint la, vola Victôr qui rarive sùvou di Marco qui mon.ne Julie so on djâle. Èle est racoviète d'on mâssi cov'teû èt brêt d'mâ

1119. Victôr : Chaud devant ! Laissez passer l'travail !
1120. Alice : (*sôrtant dèl tchambe èt a Marco*) Qui fês-s' don ?
1121. Marco : Bodje-tu, on va t'ekspliquer... (*i mousse èl tchambe*)
1122. Alice : Moncheû Victôr ?
1123. Victôr : Nin l'timps ! (*i mousse èl tchambe ossi*)
1124. Alice : Qui s'passe-t-i don Bènèt ?
1125. Bènwèt : Li p'tite va-st-akoûkî... Dji m'va houkî Denise !

1126. Alice : Pokwè fé don?
1127. Bènwèt : Çà lî a-st-arivé cinq' feyes, èle sét bin di kwè qui r'toûne... (*ennè va*)
1128. Nadine: (*sôrtant di s'tchambe*) Alice, télèfonez on pô po-z-avu ine ambulance po Julie alez, dji n'trouve pus m'GSM
1129. Alice : Èle est la avou Marco èt Victôr
1130. Nadine: Èle akoûke ?
1131. Alice : Sés rin... Dj'a sogne...
1132. Marco : (*so l'pas dèl tchambe*) Victôr dimande des draps d'main èt on bassin d'tchôde êwe !
1133. Alice : Dj'î va (*èle sôrteye èt la qu'l'ouhe dèl tchambe è-st-â lâdje, on ètind brêre èt djèmi Julie*)
1134. Victôr : (*off*) Alè corédje, ça va-st-aller !
1135. Marco : Dji sohête qu'i sét bin çou qu'i fêt cila !
1136. Alice : Vola todis les draps.... Dji r'vins avou l'êwe (*Marco r'mousse èl tchambe èt Alice èl sâle di bagne*)
1137. Denise : (*intrans sùvowe di Bènwèt. Èle a mètou des wants d'caoutchouc come on mète po fé les hièles*) Wice sont-i ?
1138. Nadine : Qui ?
1139. Denise : Li mame èt l'èfant !
1140. Nadine : La !
1141. Denise : Bon ! (*èle droûve l'ouhe*) Alè les omes, foû d'la !
1142. Victôr : (*off*) Dji so-st-infirmier !
1143. Marco: (*so l'pas d'l'ouhe*) Èt mi dji sos l'papa
1144. Denise : Rêzon d'pus'! Les péres c'est todis des éhales! Alè, sôrtez ! (*èle ahètche Marco èt inteure*)
1145. Marco: Dji m'dimande bin çou qu'èle va fé la cisse-lale !
1146. Bènwèt : Çà va-st-aller ! Èle ni fêt nin grand'tchwè mins qwand èle fêt 'ne sakwè, c'est todis bin fê !
1147. Nadine : (*a Marco*) Vos avez l'êr bin tracassé direût-on!

1148. Marco: Dihez don ! C'est mi-èfant savez téle feye !
1149. Alice : Èt vola l'êwe ! (*èle bouhe a l'ouhe*)
1150. Denise : (*off*) Qu'est-ce qui c'est ?
1151. Alice : C'est l'tchôte êwe !
1152. Denise : (*off*) Intrez ! (*Alice ni fêt qu'd'intrer èt sôrti mins on ètind tot l'minme Victôr*)
1153. Victôr : (*off*) La.... Riprindez alène... Tchoûkîz !
1154. Marco: Èt kwè ?
1155. Alice : Dji n'sés nin... dji n'a mwèzou loukî
1156. Marco: T'ès por ine bouhale sés-s' ! T'aveûs l'ocâzion d'nos raksègnî portant !
1157. Alice : C'est d'dja bon hin, wåde tes complumints !
1158. Marco: Mins mète tu è m'plèce !
1159. Alice : Nèni valèt... Dj'inme mî d'èsse è m'pê qu'èl tonk' !
1160. Nadine : Ci n'est nin l'moumint di v'kihagn'ter èdon vos deûs !
1161. Bènwèt : C'est tot l'minme damadje qui l'docteûr a tant târdji po m'ni !
1162. Nadine : Di qué docteûr djâsez-v's don ?
1163. Bènwèt : Dè meune èdon... enfin, dji vous dire li cis qui d'veve vini po vos brontches...
1164. Nadine : Ah bin awè....
1165. Marco: I m'sonle qui ça deure bin lontins !
1166. Alice : Ça, ça va pus vite po l'fé...
1167. Bènwèt : Èt c'est pu plêhant !

A c'moumint la, vola Pauline, qu'a-st-ine minerve, èt Estelle, qu'a l'tièsse bind'leye, qui rarivèt.

1168. Pauline : Salut li k'pagneye !
1169. Nadine : Vos ?

1170. Pauline : Mi ! èt leye ... Nos-avans stu vite sogneyes èt on taxi vint d'nos raminer chal.
1171. Nadine : Pokwè chal ?
1172. Estelle : Pace qui dji v'voléve pruzinter mes escusses... Dji piède li tièsse a moumint veyez-v's...
1173. Alice : Voste ome nos l'a ekspliqué
1174. Estelle : Victôr a m'nou ?
1175. Alice : I kwèréve après vos...
1176. Estelle : C'è-st-on brave savez cila
1177. Nadine : Èt vos madame Jadoule ?
1178. Pauline : Kwè mi ?
1179. Nadine : Pokwè estez-v's rimnowe chal ?
1180. Pauline : Prumîr'mint, po-z-ak'pagn'ter madame. Deuzin'mint, pace qui mi-ôto est chal al divande èt treûzin'mint pace qui dji tins todis a-z-avu m'vîr !
1181. Nadine : Vos-avez 'ne deure tièsse !
1182. Pauline : Ine tièsse est tofèr deure qwand èle a des cwènes !
1183. Alice : Bardafe !
1184. Victôr : (*vinant foû dèl tchambe tot horbant ses mains*) Vola, tot va bin, c'est... (*i veut Estelle*) Estelle ! Vos-estez la... Li crise est passeye ?
1185. Marco : Dji n'a d'keûre dèl crise mi ! Est-ce qui l'èfant est m'nou ?
1186. Victôr : Assuré qu'il est tot nou
1187. (*breyant*) Dji v'dimande si l'èfant est la !
1188. Victôr : Bin awè... C'est 'ne bèle pitite bâcèle
1189. Marco : Wice è-st-èle ?
1190. Victôr : Kwè Estelle ?
1191. Alice : Wice vous-s' qu'èle seûye don ?
1192. Marco : C'est co vreye mins dji sos tot foû d'mi

1193. Victôr : Ine feye qui dj'a dit, nin on fi!
1194. Estelle : (*avou des djesses*) Vos, vos-avez co 'nn'alez sins vos apareils
1195. Victôr : Bin awè...
1196. Estelle : Eco bin qu'dji sos la ! Èt qu'dj'a todis l'deûzinme djeû è m'sacoche... Tinez
1197. Victôr : Merci...(*i les mète*)
1198. Bènwèt : Èt kwè, ça fêt-i èfèt ?
1199. Victôr : Ça va mî
1200. Denise : (*sôrtant dèl tchambe. Èle n'a pus ses wants*) Vola... Tot è-st-a pont...
1201. Marco : Dji pous aler les veûye ?
1202. Denise : Pokwè vos pus' qu'in-ôte ?
1203. Marco : Bin dji v'l'a dit torade : C'est mi qu'est l'papa ! (*pwis tot fîr a tot l'monde*)
C'est mi qu'est l'papa! (*èt i mousse è l'tchambe*)
1204. Nadine : Vol'la tot candji lu tot d'on còp !
1205. Alice : Pourvu qu'ça deure !
1206. Nadine : Vos l'avez dit !
1207. Alice : Mins dji tûse chal mi madame... I fâret bin fé come dji l'aveûs tûsé
1208. Nadine : C'è-st-a dire ?
1209. Alice : Èl wârder chal quéques djous...
1210. Nadine : On veûrèt bin...
1211. Victôr : Pous-djdu co mète mi grin d'sé ?
1212. Nadine : I n'mâkreût pus qu'çoula ca c'est grâce a vos qu'on n'a nin viké ine catastrophe
1213. Bènwèt : Grâce a lu èt a Denise !
1214. Nadine : (*a Victôr*) Qui volîz-v's dire?
1215. Victôr : A l'aparance, i n'ârèt nole complicâcion mins i m'sonle qu'i fâreût tot l'minme les fé veûye totes les deûs par on docteur
1216. Bènwèt : I va m'ni onk'

1217. Pauline : Kimint savez-v's ça vos ?
1218. Bènwèt : Bin madame ènnè ratind onk' dispôye ine grosse eûre!
1219. Pauline : Aha!
1220. Alice : Bardaf !
1221. Nadine : Ci ... Ci n'est nin çou qu'vos pinsez!
1222. Pauline : (*mostrant si-ôûy*) La !
1223. Victôr : È vosse plèce, dji k'mandreûs ine ambulance... Èles sèrît tot l'minme mî divins in-ospitâ...
1224. Estelle : Mins si on a houki on docteûr, i n'fâreût tot l'minme nin lî fé fé corweye !
1225. Bènwèt : I n'frèt nin corweye èdon pwisqui c'est po madame qu'i vint !
1226. Pauline : La ! Tot est clér !
1227. Marco : (*rintrant*) N'a-t-i 'ne sakî chal qui m'vôreût bin rinde on chervice ?
1228. Alice : Lisquéque ?
1229. Marco : Aller à botique
1230. Alice : Pokwè fé ?
1231. Marco : Po-z-atch'ter dè champagne !
1232. Bènwèt : Vola l'meyeûse parole qu'on âye dit d'pôye on p'tit timps !
1233. Nadine : N'a nin mèzâhe d'enn'aller, i n'a chal ! Alice va nos chervi
1234. Marco : Mî, dji m'riva la
1235. Nadine : Tot va bin?
1236. Marco : Julie sok'teye avou li p'tite divins ses brèsses... C'est l'pus bê tâv'lê qui dj'âye mâye veyou! (*èt i r'mousse èl tchambe*)
1237. Bènwèt : Èt kwè Alice, ni v's-a-t-on nin d'mandé 'ne sakwè ?
1238. Marco : Dj'î va... mins on p'tit côp d'main ni m'freût nin dè twêrt
1239. Denise : Dji va-st-avou vos mî ! (*èles vont vès l'couhène, on sone a l'ouhe di d'avant, Alice rivint so ses pas*)

1240. Marco : Madame, on a soné !
1241. Nadine : Bin alez drovièt èt... fez po on mî...
1242. Bènwèt : Non, non, non... Ocupez-v's di chervi a beûre, dj'î va mi drovièt... (*i tchoûke Alice vès l'couhène*) Ci n'sâreût-esse qui l'docteur... (*i sôrteye*)
1243. Pauline : (*A Nadine qui fêt les cint pas*) V's-avez bin lèr nierveûse ?
1244. Nadine : Bin nôna. Quéle îdeye !
1245. Bènwèt : (*rim 'nant*) Ci n'est nin l'cis qu'on ratindéve mins i frèt tot l'minme bin l'afêre : C'est l'docteur Jadoule
1246. Pauline : Yes !
1247. Nadine : Bardaf !!!

Èt c'est tot !